

ASO LULU, 15 SETEMA 2021

Na nofoia e le Fofoga Fetalai le Nofoa i le itula e 9:23 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

O le a tau ia o se gagana ma le faaalalo o le Nofoa e faatulima ma faafeiloai aloaia atu ai i le mamalu maualuga o le Palemene i lenei taeao fou i lo outou soifua manuia ma le lagi e mama.

I le afio o lau Afioga i le Tamaitai Palemia, le Afioga i le Sui Palemia ma le mamalu o le Kapeneta, tainane foi lea Itu o le Maota i le afifio o Afioga i Minisita Lagolago, o paia apoapogata ia o le Fonousu a le atunuu. Viia le Atua ua tatou feiloai i lona toafilemu i lenei taeao fou mo le faaauauina o le tatou galuega.

E faafeiloai atu foi i le faafofoga tapuai mai a Lana Afioga i le Ao o le Malo ma le Masiofo, le Sui o le Fono a Sui Tofia ma le Faletua, le Faamasino Sili ma le mamalu o le Faamasinoga.

E ofo alofa ma faatalofa atu i le tapuaiga a Samoa i ona tulaga faalupe ae a le faanonogamanu a auuina faauuina o le Talalelei, aemaise le tapuaiga mau a Samoa, o lo o afifio ma papaaao i so o se tafa o le lalolagi o lo o mafai ona oo atu i ai faasalaluga tuusao o tatou taualumaga.

E faatalofa atu foi i le paia o Ofisa Sili o Pulega o Matagaluega ma Faalapotopotoga Tumaoti a le tatou Malo ua tatou mafuta i lenei taeao. O outou lava ua fai ma limataumatau o le Malo ma le tatou Maota nei. Malo le soifua manuia ma le lagi e mama.

Samoa ma lau tapuaiga, ia tapuai maia ma le manuia a o alofaiva lau Palemene i lana Fonotaga i lenei aso.

TULAFONO TAU FAAOFI O LE FAATATAUINA O TUPE 2021/2022 – felafolafoaiga i luga o le faitauga faalua – Aso 2

FOFOGA FETALAI: E tolopo Galuega a le Fono Aoao i le aso Fono ananafi o lo o saunoa le sui usufono mo Faleata Nu.1.

Ia ou te iloa o le avanoa lenei e tulai mai ai le sui usufono mo Faleata 1 e faaauau lau saunoaga. Ma le agaga faaaloalo.

Tofa MANULELEUA PALETASALA T TOVALE (Faleata 1): Ia, e muamua ona momoli atu foi le agaga faafetai i lau Afioga i le Fofoga Fetalai. E manatu o lea ua uma ona e siitia le viiga ma le faafetai i le Tapaau Sili i le Lagi aua foi feau ma galuega o le a feagai ai ma lau Afioga aemaise o le Palemene i lenei aso.

Faafetai foi ua maua se avanoa e toe faamaea atu ai le lauga a lenei itumalo e pei ona sa i ai i le aso ananafi. Se ua malo faafetai i lau Afioga i le Fofoga Fetalai, malo le tofa, malo le uta, ua malie le sua na momoli i le afu e pei o le tala i le falemusaga nai Atua. O paia le vaea, o le Atua Silisili Ese, e faaifo i le valoalo o manu i le taeao fua ae faafoagata pe a faatagimoe manu o le afiafi.

Lau Afioga i le Fofoga Fetalai, ua maea ona e paelago, e leai se taofi pe sili moa i matagi, e fai lea mo i tatou i lenei taeao. O paia uluulumamau o Samoa mai Saua seia paia Analega, e leai se vave e toliniu fitifiti i ai aua ua popo ma ua oo ma ua maea ona fili faatiti ae fatu faasolo, ua fai le taofi ma ua fai uta a le atunuu, e le toe tuliloaina pei o se pitolaau le maua. O paia faale-Malo, o le mea moni, se ua atoa usu o taeao o Samoa pei o le tala i le tamaitai o le aiga nei, ia mapu ane laia i logoe ma faaee i faletele.

Lau Afioga i le Fofoga Fetalai, e faasifo le tautai o le igafo e faalepa ma le ava tele ae se i tau momoli atu se sao o lenei itumalo aua le tautiaga a Samoa i upufai o Malo. E momoli atu le agaga faafetai ma le faagaetia i lau Afioga i le tamaitai Palemia lau Afioga Fiamē Naomi Mataafa, o lea ua e togipatauleave, ua mapu foi i tulogo le toa ma lana tafaifa i le faamoemoe o Samoa sa tuuina atu i le Atua, e ala i lana anapogi ma tatalo na tuu atu i luma o le Atua o lenei ua ae i fanua malo le faatoatoa, malo le lavapapale. Ia foi pea le viiga i le Atua e ou le viiga ma le mamalu Silisili Ese o le Atua. Faamalo faafetai.

Lau Afioga i le Fofoga Fetalai, e le lilo i atulagi, o lenei faatoa faaee auau o la tatou galuega fai i lenei Paeaiga XVII. Ona i ai lea o le manatu, se i ou oo atu i si ou itumalo o loo faapea ona tapuai mai.

Lou itumalo e Faleata Nu.1, malo faafetai, aua le paia i Tapaau ia Fiamē, le Mataafa ma le Mataia. O le paia lava lea aua le Susu o Seiuli ma alo o Malietoa, le Falelua ma Faiga ma le nofo a Pule, le Saofaiga a Atua ma le mamalu ia te oe Faleata.

E le faagaloina foi se tasi o nuu o si ou itumalo i Lepea, aua le afio o Faumuina, afio Mataia, afio foi le Tama a le Fale o Patauave, ae tainane lo la toalua ia Tomaagauaune ma Manuleleua, faapea foi le nofotama ma malae, le matua ia Tooala ma Tiufea. O paia ia o si ou itumalo. Faamalo faafetai.

E momoli le agaga faafetai i le tapuaiga a si ou itumalo, e le mafai ona faagaloina la outou tofa faatamalii, o le tofa faa-Atua, ua mafua ai ona outou filifilia lou nei sui ma lou nei tagata ua mafua ai ona ou tulai atu i totonu o le Maota o Samoa e lipoi ai upu o le atunuu, faamalo faafetai i lo outou filifilia o le sui usufono lenei e momoliina se finagalo o le itumalo. Faamalo faafetai aemaise o le faafetai i nisi o nuu o si ou itumalo o faapea ona taputapu mai e i ai Moamoā, o Sinamoga, Alafua, Lotopa, Seeseē, o Tuae fu, o Ululoloa faapea Vaitoloa ma Pesega, o lo o faapea ona afifio ma papaaao ai tupu ma tamalii, o tulatoa ma le aufueloloa ma Samoa. E momoli lou agaga faafetai i le tatou itumalo atoa.

Ona ou oo atu ai lea i le Tala o le Tupe e pei ona fofolaina i le aso ananafi, faamalo faafetai i lau Afioga i le Minisita o Tupe lau Afioga Mulipola Anarosa Ale Molioo. Malo le tautai, malo le lotonuu. Aua o le mea moni i mea nei o faigamalo, o ai lava ua i lona lima le tiute fai ma talatala faaavaitu o le tupe e muliloa le finagalo ma mafaufau o le atunuu. Aisea? Aua o le auga lea o aute, o le fatu lea o atinae i so o se Malo. Aua e le poupouina i ni lauga uumi po o ni upu molemole, o le ala lea o lau faafetai atu i lau Afioga i le Minisita. Silasila foi i le matautia o le tupe, na oo lava i le alo o le Atua na liliu ane lava le tagata ma faatau i tupe, aua e faitaulaga lea. O le tatalo, ia manuia ou faiva.

Ona ou pai atu lea i Afioga i Minisita mo ni talosaga aemaise o ni manaoga o si ou itumalo. O le a ou muamua atu i lau Afioga i le Minisita o Galuega, Felauaiga ma Atinae Eeseē. Lau Afioga Olo Fiti Vaai. Ou te manatua i taeao uma ou te usu mai ai i le poloka o auala, mai lava i Vaitoloa ma Pesega seia oo mai i Apia. Tasi lea faafitauli tele o lo o feagai ma le matou itumalo i lenei taeao ma lenei vaitau, e oo lava i nai aiga foi nei e feosofi mai totonu o le auala tele, e fiu e faatali se taimi e tauofi mai ai totonu o le auala. O lea ou te talosagaina ai lau Afioga i le Minisita, ou te iloaina e tali fetau lava, e manaomia ai se auala foi lea e fogafalelua e sau mai i ina i Vaiusu seia tau mai Mulinuu. Ou te iloa na pau ia o ituaiga auala e manaomia i le taimi nei na o auala e o i luga o le ea e foia ai le faafitauli lea. Faamolemole lau Afioga i le Minisita se i silasila ane i le vaega lea.

Ia ona ou oo mai ai lea i nisi o faafitauli o feagai pea ma lenei itumalo i tausaga uma, e ala i vaitafe. E le o po ma se laina le faafitauli tele lea i tausaga uma e pei ona ou talanoa atu ai, o le mafuaaga foi lea o le lolovaia o le taulaga i Apia. O le itumalo lenei e ese le tele o vaitafe e faalalava solo ai. A o le faafitauli o lo o tupu nei, e le o lelei ona fai auala laupapa. O le mea lea ou te vaai ai i auala laupapa la, e le tataua ona toe tu ai se puluvao e tee ai le ogatotonu, ae manaia pe a tatala le ogatotonu aua ne i toe i ai ni laau tetele e lavelavea ai. O le mafuaaga lea e mafua ai ona poloka le vaitafe, poloka le vai ma oso i luga, ia ma tafe mai luga o le auala. O lea lau Afioga, tasi lena faafitauli o lo o faafeagai ma lenei itumalo.

Ae le gata i lea, faafetai o lea ua maua sa e asia nisi o auala a lenei itumalo. Na pau lava lea na ona toe faamanatu atu. Faamalo faafetai i lau Afioga i le Minisita. Ua maua foi se tala fiafia i nisi o lenei itumalo, o lea o le a amata le latou galuega pei ona e maea asia ma saunoa i ai lau Afioga. Faafetai i lau Afioga.

Ia ona ou oo atu lea i le Afioga i le Minisita o Aoga lau Afioga Seuula. E tele nisi o manaoga o le matou itumalo e pei ona faaoo mai lea e i ai se tasi o faleaoga o le matou itumalo ua le o toe sefe mo le fanau aoga, i le nuu lea o Lepea, e le o lava foi faleaoga. O le fuainumera o tamaiti o lo o aoga ai i lea aoga e 470 ae le o lava potu aoga. O lea foi e maua i lau asiga na faia i lea vaiaso, e le o i ai se hall a lea aoga e faatino ai nisi o latou faamoemoe. O le mea la lea e taatia atu lava i luma o lau Afioga i le Minisita e fai i ai lau fuafuaga. Ou te manatu foi o le isi mea lea o lea e ala ai ona tele fuainumera o tamaiti aoga e aoga i lea aoga. Mo le silafia lau Afioga, e 12 nuu o lenei itumalo, ae na o le fa aoga primary school o lo o i ai i totonu.

O le mea la lea, na ona taatia atu i autafa o lau Afioga e manaomia se isi aoga fou e faatu i se mea o uta i Alafua po o Moamoa e faatatau i nisi o fanau o lo o nonofo i lena itu o le itumalo, i le mamao o le tausavali mai i Apia, aemaise o le mea lena o lea e mafua ai ona le aoga le tele o le fanau ona o le mamao o matua i le tau momoli mai i tai. O le mea la lea, na ona taatia atu i tafatafa o lau Afioga i le Minisita faapea lau Afioga i le Minisita Lagolago.

Ia ona ou oo mai lea i le Afioga i le Minisita mo le Soifua Maloloina lau Afioga Valasi, ia, e le toe fai atua se tala. Faafetai o lea ua maua ua ave tatou gasegase i Niu Sila e togafiti ai pei ona talosagaina. Ia faamalo faafetai. Ae le gata i lea, o lea foi ua maua o le a taunuu mai tatou masini foi lele e faata ai gasegase ae le i auina atu i fafo. Aua tasi lena tulaga o lea e mafua ai ona tele gasegase e ave i fafo ona o le leai o se masini lea e tau o le CT Scan e faatino ai le tautua lea a alii ma tamaitai fomai. Ae faamalo faafetai.

Lau Afioga i le Minisita o Leoleo lau Afioga Faualo, ia na o se manatu lava e tuu atu i luma o lau Afioga. Ia e silafia lava e lau Afioga o ta itumalo o itumalo e tu taulaga. E pei o le mea lea e fai ma faalavelave i afiafi i taimi o faigalotu aemaise o le leva o le po. Ou te iloa o lea e i ai le Tulafono i mea o taavale afi i mea foi ia o laau a taavale lea e leoleoa i le leva o le po, ae le gata i lea o mea o moli foi ia e le faatagaina i luma o taavale i po e fai faalavelave i isi avetaavale, ae faapea foi mea o le tele o puea lea ua tele ina faaaoga e nisi o taavale afi. Na pau lava lea ne i te i ua pe ai se fatu o se toeaina po o se loomatua, i le leotetele o na faamoemoe. O le mea lea e tupu, a o atu taavale e o e ave e pasi ona aveese lea, ae a omai foi i tua ona toe faapipii foi lea. Pei o le vaega lena o lea e tele ai le faaletonu lea i le tulaga o taavale afi, aemaise lava o le tupulaga foi lea i le soona faaleotetele o latou laau i le vaeluapo ma le taimi o faigalotu. Ia, taatia atu pea i talaane o lau Afioga i le Minisita mo lea faamoemoe.

Ia ona faamaea atu ai lea o se lauga a lenei itumalo e momoli atu ai le agaga faafetai i lau Afioga i le Tamaitai Palemia, maua le tofa ma le faautautaga aua le taitaiga o le tatou Malo. E faapea foi lau Afioga i le Fofoga Fetalai, maua se finagalo aua le faatautaiga o le Fonousu a Samoa. E faapea foi i Afioga i Minisita o le Kapeneta, maua so outou finagalo aua le taitaiga o Matagaluega. E faapea foi Minisita Lagolago, ia maua pea lo outou soifua laulelei aua le lagolagosua i Afioga i Minisita. Faafetai foi ia Samoa o lo o faapea ona faafofoga mai i atunuu mamao, aemaise o la outou faafofogaaga i lenei taeao, aemaise o le tatou Fonousu.

Ia manuia Samoa ae ola le sui usufono mo Faleata Nu.1 i le alofa ma le agalelei o le Atua. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Faleata 1.

FOFOGA FETALAI: Faamalo faafetai saunoa i lau Afioga i le sui usufono mamalu mo Faleata 1. Atonu o lea ua faafofoga ma le totoa le Malo ma le Kapeneta, aemaise foi o le faafofoga mai a le atunuu ma le itumalo, faamalo faafetai. E talitonu lava o lea ua oo lava lau talosaga i faiga faavae a lo tatou Malo, aemaise lava o mea tau aoaoga ma le soifua maloloina aua si ou itumalo. Malo faafetai. E talitonu foi, ia lea ua faafofoga ma le totoa ma le malamalama lou itumalo i lou finagalo faaalua. Ae tapuai laia ma le manuia ae lafo i le Palemia ma le mamalu o le Kapeneta mo le latou galuega.

Faamalo faafetai. Malo saunoa.

Ia, ou te iloa o le taimi lenei ua avanoa foi le tatou Maota mo se tatou sui usufono mo le faaauauina o le tatou Tala o le Tupe. O le avanoa lava lenei o a outou lauga faataupou, faafogafoga mai foi outou itumalo, ua oooo lava a outou saunoaga ma outou lauga i nai o tatou itumalo, aemaise lava faiga faavae o le tatou Tala o le Tupe aua a outou saunoaga.

Ia o lea ua matau atu o lea ua sauni mai le sui usufono mamalu mo Lefaga ma Faleaseela. Saunoa ia lau Afioga i le sui usufono mamalu. Ma le agaga faaaloalo.

SAUNOAGA FAA-TAUPOU

Afioga MASINALUPE MAKESI MASINALUPE (Lefaga ma Faleaseela): O le puipuiga a le Atua ma le faamamaluina o e ua faatuatua ia te ia. O le nofo i le mea lilo o i ai le Silisili Ese, e mau o ia i le paolo o le ona le malosi uma lava. Ou te faapea atu i le Atua, o lou malu oe ma lou olo, o lou Atua ou te faatuatua ia te Ia, aua o Ia na te laveaiina au i le mailei a le fai maunu ma le faamai e oti ai. E ufiufi ifo o Ia ia te oe, e malu foi o Ia i ou aao. O Ia lava o le Atua na te puipui lou ulufafo ma lou ulufale, e leai se tasi

e na te faatupuina se faalavelave ia te oe. E toatele i latou o e faapea ifo ia te oe, o oe o le tagata agasala, peitai o lo o ufiufi e Ia lou lava soifua ma lou ola. E pauu se toaape i ou tafatafa ma le mano i lou itu taumatau, e le taitai ane ia te oe, na ona vaai i ai ou mata, e te iloa atu foi le tau i o e amioleaga. E pauu se toa afe i ou tafatafa ma le mano i lou itu taumatau e te iloa atu foi le tau i o e amioleaga.

O le Salamo lea sa fai ma toomaga o le nuu o le Atua i le taimi e lalata mai ai le fili, e alalaga ai ma pepese ai le nuu o le Atua, aua ua latou mautinoa, o le Atua na te puipuiina i latou ma faamamaluina i latou.

Lau Afioga i le Fofoga Fetalai, e faatalofa atu le sui usufono mo Lefaga ma Faleaseela i lau Afioga i le Fofoga Fetalai faapea le Sui Fofoga Fetalai.

Ou te muai faatulou ma faatalofa atu i lau Afioga i le Tamaitai Palemia, lau Afioga i le Sao Faapito, o le uluai tamaitai ua filifilia e avea ma Palemia ua le gata i Samoa nei ae ua faapea foi le atulaulau ma le Pasefika.

Ou te muai faatalofa foi ma faatulou i le afio o lau Afioga i le Sui Palemia, lau Afioga i le Saoalii. Ou te faatulou foi ma faatalofa atu i Afioga i Minisita o le Kapeneta, e faapea foi ona ou faatalofa ma faatulou atu i le paia o Minisita Lagolago.

Ou te faatalofa foi ma faatulou atu i le paia o le mamalu i le Sui Failautusi ma le Ofisa o le Fono Aoao Faitulafono. E faapea foi ona ou faatulou ma faatalofa atu i le Ofisa Sili o Pulega, Ofisa Lagolago o le Pulega o Galuega a le Malo i CEOs ma ACEOs. E le gata i lea, e faapea foi ona ou faatulou ma faatalofa atu i le paia o Faalapotopotoga Tumaoti e fia o le Malo o Samoa.

Ou te faatulou foi ma faatalofa atu i le tapuaiga a Le Ao Mamalu o le Malo ma lau Masiofo. Le Sui o le Fono a Sui Tofia ma lau Masiofo. Lau Afioga i le Faamasino Sili ma le Ofisa o Faamasinoga ma le tatou Faigamalo. O paia ia ma mamalu aua le tafatolu o le Faigamalo a Samoa.

Ou te faatulou foi ma faatalofa aua le paia o le aufaigaluega tofofi a le Atua o lo o faapea ona faafalelemalu ma faatunapaulia i afioaga ma alaafaga aua le tauasuina o le ipuvai o le ola. O la outou matafaioi o lo o nono ni manu aua ni manuia o Samoa mo a taeao.

Ou te faatalofa atu foi ma faatulou i paia faale-atunuu, le paia o Aiga o Tupu, Aiga o Nofo, Aiga o Papa ma Aiga na Tafaiifa. Le mamalu i le Usoga a Tumua ma Pule, Ituaa ma Alataua, Aiga i le Tai ma le Vaa o Fonoti.

Afai foi ou te oo atu i tatou uso a tuaoi i le motu i Sasae, Tutuila ma Manua. E le faagaloina foi le tapuaiga le leoa a o tatou uso, le paia o Sua ma le Vaifanua, Fofu ma Aitulagi, Saole ma Saleaamua ma le Launiunasaelua, Ituaa ma Faatuiolomotu, ma tootoo o le Faleula ma upu i le Manuatele. E le gata foi i lea, aemaise foi o le faafofoga tapuai o tupu ma tamalii, o tama fanau a si o tatou atunuu, o lo o faapea ona galulue i atunuu i fafo, o lo o latou tui le mulipapaga ma tatalo mai, ina ia manuia faiva o si o tatou atunuu.

E manatu o lea ua ifo i Malae Sa tia o le tautiaga, ua toto foi i Tiafau tia o le maimoaga na i malae o le faautugalagi a Samoa, ona ua gase galu, ae faailo mala o puava. Aua o lea ua lalaga peau matamataloloa o Fagalele i lenei taeao, i le alofa ma le agalelei o le Atua. Aua o Fagalele e tea ai le soua. Ona ou faapea lea, tau ia ina ou faasee i Muliava, se ua ta fia faalanu i le vai i Nufoa. Aisea? Aua o lupe sa fuifui faatasi, e ui ina sa vaoseese. Ou te lagona, o le a ou le toe ta i utumaau, e faigata o lele ua oooo le tai o atoa. A ua le o toe tu foi se ola, e pei o le upu i le faiva o tamaitai, ae tau ia ina ou faapitofua i moana, se i tau lava ina sula le agalelei faasoa o le Atua. Se i tau ina ou sau, ou faasee ai i vaaalii na i matatu ma le vaasa na i Amana, aua se faafetai i si ou itumalo. Ae o le a avea ia lenei avanoa faaauo, ou te faafeiloai atu ai ma faatalofa i si ou itumalo, o Lefaga ma Faleaseela. Lou itumalo e, I am so proud of you, I love you.

O le a ou tomua i susuga i faafeagaiga taulagi, aua o faafeagaiga taulagi a le paia o le aiga sa Tuala ma la latou tama. Tainane le matua ma le Taulagi, le mamalu ia Gagaeolo ma le itu, tainane le fale Tuisavailuu, le Faleaana ma tagata o le vavau. O si ou itumalo ou te mimita ai.

A fai ou te amata mai i Matautu i le malaeoletoto, seia ou paia le auvaemauga o le nofoaga na liua ai le vai o le tamaitai, le tamaitai o Sina. E mafai ona ou faapea atu, tulouna le afio o le aiga suafa, tulouna le afio o Lemalu ma Le Mamea ma lo lua fale na luafua. Afifio le usoalii ma le mamalu ia Salealii. O paia ia ma mamalu o Matautu. Tulouna le susu o Sua e ou Lefaga, afio Faumuina, afio Tuapepe o le tamaaiga, afio le usoalii maliu mai Gagaifolevao. O ou paia na ma mamalu o Gagaifolevao. Tulouna le afifio o Fui ma Malama, afio Tusanilefaiaao, mamalu mai le atalii faiga. O paia ia ma mamalu o Savaia. Tulouna le afio o Tualatamaalelagi, afio Tusani ma Leupepe ma le matua o Lepale, maliu mai Saiauta, o paia na ma mamalu o Tafagamanu. Tulouna le afio o le aiga sa Tuala le uso ma le ailaoa, le mamalu o le fale Tuisavailuu, lau tofa Tuimaiava o le tafaipaia. Lau fetalaiga Masinalupe ma lou itulauniu. Lau tofa Finau o le launafausia, lau tofa Afioivaa o le tapaaufanua ma le mamalu o le nofo a ituaiga. O ou paia na ma mamalu o si ou nuu o Safaatoa. Tulouna le afio o le aiga taulagi, afifio le matua o Satuala, susu mai le Usoalii, maliu mai Taloolevavau, maliu mai Poloefa o le Faleaana, maliu mai Soamuli ma le Faleaana. O paia na ma mamalu o Faleaseela ma Matafaa. Afio le taupou ma le feagaiga, maliu mai le tootoouli o faleupolu. O paia na ma mamalu o Tanumalala.

E faapea foi ona oo se faamatalaga i nai ou uso sa matou tauva. E momoli atu le faafetai tele ona o le faatamalii o le faiga o si a tatou taaloga. E leai lava se tasi o i tatou na tauva i le faiaina. Sa tatou tauva i le mea e gata ai le mafai o le tagata. E ui lava ina sa outou manatu faatauvaa ma faapea ifo, o au o le bus driver. Ae ui i lea, o lea ua saofai le bus driver e lipoi upu o le atunuu, ia aua ne i tetena i outou finagalo. O le upu lava e toe sau malama ma e toe oso foi le la, afai o au nei a o oe se isi taimi.

E le faagaloina le paia ma le mamalu o faafeagaiga, tupu ma tamalii tainane faleupolu, fanau a lo tatou itumalo o lo o alala i fafo, Niu Sila, Ausetalia, Amerika Samoa ma Amerika mamao po o USA, ma so o se tafa o le lalolagi. E faapea foi na i o ma aiga ma le tina o tamaiti, o lo o i atunuu i fafo ma Samoa nei. E le gata i lea, e faatalofa atu foi i le mafutaga a tina faapea saoa ma sa'otamaitai, faletua ma tausii, sa Fuatino ma Muagututia o le malosii o le itumalo, e oo lava i le tinifu. E talitonu e le gafataulimaina e la outou auauna, le faaalalo maua ua outou faatietie ai le tagata faatauvaa. Ua outou filifilia ai lenei auauna, e tau molimoli se leo o Lefaga ma Faleaseela i lenei Paeai. Ua faafetai i la outou puleto, ua ou pale ua ou titi, ua ou ula, o la outou pule lea, faafetai. O le upu e fai i le autufuga, e tamatasila le agaiotupu, ae popoe ai ma atugalua le taufalemau. Ina ne i salautauta le faleta ona le tau lea o lau o le faamoemoe, ae tapuaia maia se i fai se tala i le tatou Faigamalo. Aemaise o le Tala i le Tupe, ma Afioga i Minisita o le Kapeneta.

Lau Afioga i le Fofoga Fetalaia, ou te fia paia le Tala o le Tupe. Lau Afioga i le Minisita o Tupe ma lou soatau. E momoli atu le agaga faafetai o le sui usufono mo Lefaga ma Faleaseela. Se ua o se ligoligo lou fofoga, e ese le tagitagi o le afi o si au taavale i le aso ananafi. E le gata i le leo malie, ae ua manino atoa le faafofoga ma le faalogo. Ou te le tau selu atu, a o le upu lava e fai i tamaitai, ua faaifo le faiva o le tamaitai e pei o le fetalaiga o le faiva o le tai. Ua le o toe tu foi se ola, e pei o le upu e fai i le faiva o tamaitai. Se ua e tapena faafafine toaga Tala o le tatou Tupe. Ae ui i lea, e so o se faigamalo lava, aemaise o so o se tafa o le lalolagi, o le tupe o le ute lea o faigamea. E faalagolago i ai le atinaeina o Malo ma ona tagata, aemaise o manulauti ua faataatia mo le tatou atunuu, aua foi lenei lima (5) tausaga. Ou te manatu, e ui lava ina i ai la oulua faasoa, e le mafai lava ona uma le agaga o le manao pea, manao pea. E pei o le ma Matagaluega, manaomia lava sina isi vaega e toe faapooa i ai, ona o lea o le a ma tutu faatasi e matua uunai ina ia tele mai ni tupe i lafoga, aemaise foi o tiute. Aua a fiafia le aufaigaluega, e pei o le emo o le uila le o. O le tulaga i le faasoa, o lena e i ina le uta a le faimea, faamalo faafetai. Ona ou oo atu lea i le Afioga i le Minisita o Galuega, Felauaiga ma Atinae Eeseese, se a ou vaai i le Minisita lea pei ua ou vaai i tama o le mafia. O le tama e pei e faaleata seivagana o le taimi foi lea ua lua talanoa faatasi. E pei e foliga o se tagata e sau, ae o le tagata e tumu i le alofa. E le avatua ni au faamatalaga e fai ma mea e te ita ai ia te au, pe fai ai loa mea ou te manao ai taeao. Ae na ona ou faaoololomaau i lau Afioga i le Minisita, Olo Fiti e le aea e se fili ma se tiapolo.

Se i ou amata atu i nisi o nuu o lou afioaga, e pei o le matou nuu o Faleaseela, ua leva lava ona taatia foi i lumamea nei ni talosaga a se tasi foi o tamalii ua tuua le Malo. I le auala lea e fai ma auala galue, aua a silasila i ai e tataua ona sau le taavale mai Matautu seia paia Lefaga atoa ona faao lea i uta i Faleaseela, ae peitai e le o oo taavale i uta, o lo o gata lava i tai i le aai.

O le isi foi vaega, e taua ai lenei auala, ona ua fai si toatele o tagata ua i tai. Ae ou te lagona e pei o le tuumumusu a tagata, a oo ina lelei le auala lea, lea e alu i uta, o le a toatele foi e o le a me'i i ai i uta e faatino ai o latou fale. Ae le gata foi i lea, ae o le a faigofie ai foi femalagaaiga. Aua a fai e alu atu le pasi, aua e tasi lea au auaunaga na fai, na ou tautua mai lava i le taeao i le vaveao, seia oo lava ina pogia. Ou te usu mai lava i le taeao e aumai tagata faigaluega, toe manava i le afiafi ou toe alu e ave. Ae o le manaia o le auala lea, afai e te oso atu i Matautu e ao atu lau pasese, ona e alu atu ai lava lea i Faleaseela ma e sau ai loa agai mai i Apia, e te le toe foi i o. E pei o le taua lea i lau Afioga i le Minisita o Galuega tetele.

Ona ou oo mai lea i Safaatoa, o le taimi nei e le o i ai se aualagalua, e le o i ai se aualagalua o Safaatoa, ua na o le auala e fesoasoani mo taimi o afa ma taimi o faalavelave faale-natura o lo o i ai, ae o se auala lava ia e o ai tagata e galulue, o lea e taumafai atu i lau afioga.

Lau Afioga i le Fofoga Fetalai, e faapea foi ni manaoga e auala atu i lau Afioga i le Minisita o Galuega. O i Matautu, e fia faaleleia lau afioga le auala e agai i uta, e le gata i nisi o ekalesia o lo o i ai, o lo o matua mafatia i le leaga o auala, ae o lo o faapea foi ona ui ai le toatele o isi e agai atu i faatoaga. Atonu o le a faasaoina ai foi se taimi mo le Minisita o Faatoaga, i tulaga e pei ona ou taua.

O le isi vaega, ua fai lava si loaloa o aso, e le o mafai lava ona faaleleia le auala lea e alu i tai i le mataaga o le Matareva, ona o le taimi nei e matua e faatu e te alu i ai, ona o le leaga tele o le auala. Ou te manatu ma ou talitonu e toatele nisi o lea e afifio mai, e masani ona o e weekend ai, pe o foi e tafafao ai. Ua faasolo ina alofia ona o le leaga o le auala, tuutuu atu i autafa o lau afioga i le Minisita. Lau Afioga i le Fofoga Fetalai, o nisi na o vaega ua faaleo atu e auala atu i lau Afioga i le Minisita o Galuega.

Ona ou oo atu ai lea i le Minisita o le Soifua Maloloina, lau Afioga Valasi, se ou te le tau selu atu, ua ese le tulaga ua i ai le Matagaluega o le Soifua Maloloina talu ona e i ai. O le taimi muamua na ou oo atu ai, e fia maua lava se fesoasoani mo se tasi o faifeau mo le matou itumalo, ua toesea lona aao taumatau mai le falemai. Ua leva ona manaomia se wheelchair. Ua fai si leva ona manaomia e le faifeau se wheelchair e feaveai ai, e fai lana galuega faaauau o le talai o le finagalo o le Atua. Ae faafetai, o lea lava sa uia lava le ala o mea, e leai se mea na faaluafesasi ai, pe ui foi, pe oso atu i lalo o le laulau. E leai o lea sa faamalieina uma le process, seia oo lava ina aumai le wheelchair, o se wheelchair ina a manaia. E fai o le lapopoa o pau ae max foi ona rim, faafetai i lau afioga.

O le vaega o lo o taua i i i le Tala Faatatau o le Tupe, o lea ou te maua ai, o lo o i ai le \$3 miliona aua le toe faaleleia o falemai, faatasi ai ma faleapitaga o fomai. E leai se falemai o lenei itumalo, o lona uiga e tataua ona fai se falemai, ma lou faaaloalo lava. Ua 40 tausaga o lo o pologa pea Lefaga ma Faleaseela e tau saili i Saanapu, saili i Leulumoega se fofo o nai tagata

gasegase. Mo le silafia, e pau lava lea o le tulaga e le mafai ona e iloa o le a e gasegase nanei. Ae na ona ou faaoololomaau, pe le i alagatau i lenei taimi ona faatino sina falemai mo Lefaga ma Faleaseela. E le o se matua falemai tele, e tau lava o sina clinic, ma ni moega se tolu (3), ma se fomai e nofo ai, taatia ai loa ma le ambulance, o, ua atoa la mea uma, ua talafeagai. O le manaoga lava lea a o le i sau i lenei Palemene, o le mea lava lea sa manaomia o sina falemai. E mafua lau tala, leaga o au ou te tigaina i i, i le va lea, o le taimi o le vaeluapo, ae tuitui mai, se i aumai lou auala se i ave ai si loomatua i le falemai. O le ala lea o lou manaomia ai o lea auunaga, ua fia maua foi e si o matou itumalo, se ola saoloto mai nei fuafuaga fai, aua lava se falemai.

Ona ou oo mai lea lau afioga i le Fofoga Fetalai, ou oo mai i le Minisita o Leoleo ma le Sui Minisita. E tasi lea Matagaluega sa ou fia alu lava i ai, ona ou te iloa o le fatu lea o le saoloto ma le saogalemu o tatou tagata. Ma e mafua foi ona, ou te iloa o na e silafia e le Minisita, e le gata foi i tulaga o taaloga lakapi, ae faapea foi e i ai lou tomai faaleoleo na maua mai fafo. E le o oo la i ai se tomai faapea o le afioga ia Fepuleai.

Afioga Toeolesulusulu Cedric Pose Salesa Schuster (Aana Alofi Nu 4):
Lau Afioga i le Fofoga Fetalai...

FOFOGA FETALAI: Si na au malologa se i tuu atu le avanoa i le sui usufono.

Afioga Toeolesulusulu Cedric Pose Salesa Schuster: Faafetai i lau Afioga i le Fofoga Fetalai, ae faamalie atu foi i le sui usufono o lo o lauga. O le maua foi si na malologa, ae matau atu lau Afioga i le Fofoga Fetalai. E tusa ai o le tatou Tulafono Tumau e avatu ai se talosaga, ina ia mafai ona faaopoopo nisi minute i le lauga ua saausi a Lefaga ma Faleaseela.

FOFOGA FETALAI: A gasea lava le sui usufono mamalu, o lea lava e tuuavanoa atu lava le Nofoa, o le manatu lava o lo o faaauau pea le saunoaga, o lea lava e maua le avanoa. Saunoa le sui usufono mamalu.

E pau lava lea e fautua atu i le saunoaga matagofie a le sui usufono mamalu, ia a tatou Tulafono Tumau e le mafai ona taua se suafa o se tasi. Ia e fautua atu pea, e moni lava o le uso a Minisita Lagolago ae le mafai ona faailoa le suafa i totonu o lau lauga ma le faaaloalo.

Afioga Fepuleai Faasavalu Faimata Sua (Salega 1): E talu ai o lea ua taua e le lauga foi mai Lefaga ma Faleaseela lou igoa. Ua outou silasila mai i le pine lea, o le mea lena e tau atu ai, e i ai le tomai o le Sui Minisita i tulaga faaleoleo. Faafetai.

FOFOGA FETALAI: O lea lava ua maua, o le mea e sili ona taua, o se fautuaga lava i le sui usufono o lo o tulai, e alofa foi i le tulaga o lo o outou galulue ai. Ae i ai le manatu o tatou saunoaga faataupou, e le o i ai se taimi faatapulaaina, e maua lava le avanoa mo outou sui usufono mamalu, aemaise lava o lenei avanoa e faafogafoga mai ai outou itumalo. O le avanoa lava lenei, e faamaape mea uma o lo o i lou finagalo, aua se manuia o lo tatou itumalo. Ma le agaga faaaloalo.

Afioga MASINALUPE MAKESI MASINALUPE: Faafetai i lau Afioga i le Fofoga Fetalai, o oe lava o le Tama e malu i ai. E momoli foi le faafetai i le uso a sui usufono ia Toeolesulusulu, faafetai mo le faaopoopoina o ou minute. O le mafuaaga lea na ou taua ai le suafa o Fepuleai se i tulou, aua ou te iloa se i faauilavea loa se i fai sau malologa. O lea foi la ua toe maua le malosi e faaauau ai lau lauga. Lau afioga i le Minisita o Leoleo e leai lava se mea o ponaia ai lau galuega, malo faafetai, aemaise foi o le tausaiaina o le filemu, mai le aso ananafi seia oo mai i lenei taeao, e le faigofie le galuega o lo o feagai ai ma lau afioga i le Minisita ma lau Minisita Lagolago.

E pau lava o lea, ou te le o ma iloa po o gafea tonu le Matagaluega e aafia ai le mea lea sa ou maua, leaga o lea ua sau i luga o le TV, mea foi ia o fugafuga. Po o ai ua faaauauina po o le Ofisa o Faatoaga po o le Ofisa o Leoleo. E fia malamalama i ai lou sui usufono, leaga o lea e le o toe maua atu lava se tala i ia foi fuafuaga.

Se i ou oo atu i le Minisita o Faatoaga. Lau Afioga i le Fofoga Fetalai, o se lagona e pei ona i ai le tulai mai o le Minisita o Faatoaga ma le Sui Minisita, e ese le tulaga ua i ai. Ua ou matau atu i luga o le facebook ua lua soo mai Savaii. Ia masalo ai foi o lea ua faagasolo iinei, ae manaia pe afai ae vave atu i tua i Lefaga ma Faleaseela, ona o le tulaga e pei ona i ai, ua tele ina tau faaletonu le maumaga. Ua fai lava si tele o le faafitauli i uta i le vaota, ua tele le puaa aivao. O le ala lea ua sosola mai ai le aufaifaatoaga mai uta ma agai atu i autafa o tuamaota ma tualaoa. A o le faalavelave foi la ua tulai mai, ua sola mai uta i puaa aivao, ae ua faatamaia e manupapalagi. Ia na ona tuutuu atu, o le a se finagalo i ai i nai pa foi ia i se poloketi faamolemole se i tufa atu ai ni pa foi ia e pupuni ai ia faasoina maumaga mai nei manu faalafua. Ia, atoa ai ma le faagasologa o fuafuaga uma e momoli lava le agaga faafetai, ona o le matauina o la oulua Matagaluega o lea lava e faaauau a lua asiasiga ma faamalosiau foi i le aufaifaatoaga, e tele lava le manuia o le a maua e o tatou tagata pe afai e naunau pea e faatino lea vaega. Aua e ala ona tele o tatou tagata e agai atu i fafo, ia ona o le lē maua o le tamaoaiga o le tupe e maua i aso uma. A o lea ua matauina le market authority ma isi mea uma, ae na ona aumai lava o fua o faatoaga maua loa le tupe e le tau sau e nofonofu i le maketi.

Ia, ou te talitonu ua lava lea i te i ua le oo i se isi Matagaluega ona faapea lea e le amanaia. Toe tasi lava lea, o le Matagaluega lea o le Environment

ona e i ai lava le laau ua fai ma faafitauli, tau ia o laau faalafua. E le i maua lava se fofo o le faafitauli o lenei laau o le laau lea o le faapasi. A silasila i ai le Matagaluega lea i o matou tuamaota ma tualaoa, ua pei o ni laau foi lea ua matua ola lava e pei o ni faatoaga o la e tuu i ai ni faalelei eleele. A o le le manuia, ona e tele ina afaina ai faatoaga. Ia, pe maua se fofo vave e tineia ai lea laau, aua o le mea o lea ua faatupulaia ai, ua ese ona ta atu, ae ua ave foi e fai ai pou o pa o lafumanu. Ae se i silasila ane i ai i se auala e ono faatamaia ai, e le gata i le laau lea o le faapasi, ae faapea foi i isi laau pei o le lapiti, po o i ai ni vailaau e ono tineia ai ia atoa ai ma le tele, ma le kuava. O laau faalafua ia ua fai ma faalavelave. Ae le gata i lea, ma le laau lea o le vao tuaniu. E tele tele ma fiafia tele lenei vao faalafua e ola i totonu o pa lafumanu pei o pa o manupapalagi.

Lau Afioga i le Fofoga Fetalai, ou te talitonu o lea ua maea ni manatu foi o Lefaga ma Faleaseela e pei ona ou faaleoina. A o se manatu faaiu i le Tala o le tatou Tupe, e lagolagoina e lou sui usufono lenei Tala o le Tupe ua manino ma atoatoa fuafuaga uma e pei ona faataatitia.

Ia, lau Afioga i le Tamaitai Palemia, ia maua lou lototele, ia maua le tofa faale-Atua e feagai ai lau Afioga ma ou tiute fai aua le taitaiga o le tatou Faigamalo.

Lau Afioga i le Sui Palemia, e faapea foi se lagona, ia maua le lototele, ia maua pea le fiafia, foai le tomai mai le Atua e lagolagosua ai aua la oulua galuega pulupululima faatasi. Ia, alofagia foi le lavalaoa o Minisita o le Kapeneta, maua le tofa faale-Atua, maua le malosi i le tino, le mafaufau, faasili le agaga e mafuta ai i le Atua i so o se taimi o le soifuaaga.

Ia liliu mai lenei itu o le malu, alofagia Minisita Lagolago, ia maua pea le malosi, ia maua le faatoatoa, tatou lototetele, aua tatou te faalogologotiga. O tatou, o tatou tatou te tamoemoe solo i le faatinoina o mea e finagalo i ai Minisita. Ia tatou maua le fealofani.

Lau Afioga i le Fofoga Fetalai, ia maua le lototele i lau Afioga e faatino ai ou tiute fai, aua le faafoeina o le Palemene o Samoa ia maua le fealofani, maua le fiafia. Alofagia le Sui Fofoga Fetalai, aua la oulua galuega soosootauau, ia maua le faautaga, aua le lagolagosua i le galuega.

Alofagia Ofisa Sili o Pulega o Matagaluega ma Ofisa Sili Lagolago. Ia maua pea le lototetele. Ia, o le motto lava a tatou aemaise a le Malo mo le aso, Government of the Day, tatou galulue faatasi. Ia maua pea lo outou tomai e faatino ai outou tiute, faatino foi i le loto maualalo ma ia faatuatua o lo o soifua pea le Atua. Ia, alofagia faafeagaiga o lo o talafaaauto i so o se afioaga ma so o se alaalfaga aemaise o Samoa, ia maua pea le lototetele e faatinoina ai o latou tiute fai, nono ni manu aua Samoa mo a taeao.

Ia, nai o tatou tagatanuu o lo o i atunuu i fafo i so o se tafa o lenei lalolagi, ia alofagia ia maua pea e outou le fiafia, maua lo outou malosi, aua lava ne i muta le tatala pea o le faamalama ma silasila mai i si o tatou atunuu ina ia tulaga lelei ma manuia. Ia manuia foi le Ofisa o le Fono o lo o nafa ma tiute

ma faiva, Sui Failautusi aemaise e o lo o faauluulu i ai le Ofisa o le Fono. Ia maua le lototele e faatino ai outou tiute.

Alofagia si o matou itumalo, o la outou tatalo e maua ai pea le malosi o la outou sui usufono e faatino ai tiute i totonu o le Palemene. Ma le faaaloalo lava, soifua ona o le Atua. Amene.

Na faaalua le agaga faafetai o le Maota i le patipati o latou aao i le maea ai o le Saunoaga Faa-Taupou a le sui usufono mo Lefaga ma Faleaseela.

FOFOGA FETALAI: Ia, e momoli le agaga faafetai i le sui usufono mamalu mo Lefaga ma Faleaseela. Ou te talitonu lava o lea ua lagonaina foi e le paia o le Maota aemaise foi o le faafogafoga tapuai mai a le atunuu aemaise o lou itumalo. Malo saunoa, faafetai foi le tofa, aemaise lava e le gata o le faafetai i le itumalo, a o lea lava ua oooo lou finagalo aua lava galuega taua ma mea o moomia e lou itumalo. Malo faafetai. O lea foi ua faaalua lou lagolagoina o le Tala o le Tupe, aemaise foi o lau faamanuia i le Palemia ma le Kapeneta ma le Fofoga Fetalai, aemaise foi o Ofisa Sili o Pulega o Matagaluega ma Faalapotopotoga a le tatou Malo. Faafetai mo le saunoaga.

O lea foi ua avanoa leni taimi mo se tasi o sui usufono mamalu. Ia, o lea ua matau atu o lea ua tulai mai le sui usufono mamalu mai Gagaifomauga 2. Ia o lou taimi leni e te sausaunoa ai. Ma le agaga faaaloalo.

SAUNOAGA FAA-TAUPOU

Afioga VAELE PAIAAUA IONA PAIAAUA SEKUINI (Gagaifomauga 2): Lau Afioga i le Fofoga Fetalai, e piama leni itumalo i le taulaga osi ua maea ona e siitia i le taeao ua sola, tatou te faanonomanu ai i le aao totoo mai o le tatou Matai Sili i le Lagi e taiaina ai feau ma galuega a leni Palemene. Ia, tau ia ina ia saga uluulumatafolau i aai o finagalo ma faamoemoe e maua ai pea le malosi aua le faatinoina o le valaauina.

Lau Afioga i le Fofoga Fetalai o le Maota, e momoli atu le faafetai ua maua se avanoa o leni itumalo o Gagaifomauga Nu.2 se i faaleo foi se lagona a o se faamatalaga e uiga i le Tala Faatatau Autu o le Tupe, o lea ua opea nei i le Laulau a Fono 2021-2022. E momoli foi lau faafetai tele i nai ou uso sui usufono mamalu ua maea ona sausaunoa, faalele fulu aua le Tala o le Tupe ua i luma o le Laulau a Fono.

O ituaso faapenei lau Afioga i le Fofoga Fetalai, e moni ai folasaga a mea nei o sulatoga, ta te moe ae le ma moe, ta te nofo ae gatete, ta te tu foi ae lilia. A fesili pe aisea? Leaga ua paia le Maota o Samoa, ua mamalu foi le mea nei. Ou te toe tomanatu ai i le Tala ia Mose ma le laau talatala. Fetalai

le Atua ia Mose, “Tatala ou seevae ua sa le mea nei.” Ma ua alagatatau lava. Aisea? Leaga o lea ua afifio mai tupu i Tiafau nei, o lea ua afifio mai tamalii, ua maliu mai ponaoo, o tootoo, o tulati ma tulatoa o Samoa, aua o Tiafau o le malae e potu i ai aiga, e faufau ai tia o le tautiaga. O le malae o le faautugatagi a Samoa, e lipoi ai ona upufai o malo ae lufilufi ai le tamaoiga aua le tapuaiga mau a Samoa. O Tiafau o le malae i Tiafau nei, o le fale e gase i ai le faleoo, e sulu i ai le tagata ua puapuagatia, ae ola ai le pagota ua sala lana aga. Aua fai mai o le anofale o le Maota o Samoa e anagata, o lona fausaga e mamana i le aga tausili ma le agaalofa, ae salani mea uma i le faamaoni ma le amiotonu. Aua o le Maota o Samoa fai mai tuua ua mavae, o le Maota lava e tulutuluitao ua soo ona taiao. Ia, ma e leai lava se isi e fia toli niu fitifiti i ai.

Lau Afioga i le Fofoga Fetalai, ou te fia faatepa le Maota i le mamana o galuega a le Atua. O le lagi fetalai o mea uma o le foafoaga mamana a lo tatou Matai Sili i le lagi, o le mea lea o lo o femolimau i le lanumeamata ma le lanulauava ma le lanumoana o le vasaloloa. O pesega malie a manu o le vateatea ma manu o le laufanua, o lo o fetalai ma fisaga agimalu o le savili, lele e puaiina mai ai le ea malu ma le matagofie, e puaiina mai ai le manava o le ola o lo o outou soifua ma tatou malolosi ai. O le foafoaga mamana lena a le tatou Tapaau Sili i le Lagi e atagia manino mai ai foliga alofa ma foliga filemu o le foafoamea o le foafoaga. A o upu la a le Pese, ia o ai a le fia pese? O ai se a le fia vivii? Ia faapea ifo, ia faamanuina lava le suafa o le Alii ma saga faatumauina pea le viiga o le tatou Matai. Ia, lau Afioga i le Fofoga Fetalai lau Afioga Honourable Papalii Taeu Masipau, ee ia i lou nofoa vaevaeloloa e faafofoga ia te oe le Palemene o Samoa. Ae ou te muai faapoipoi vagana i alofisa o tupu nai le malae o le vavau, aua o lele ua fotupule le faiva o tama nai le ite a le malama, ae fougata ai le sa o le tamaloa mai Gagaifomauga. Aisea? Leaga o Samoa o le aomamala, o le ua e faalaofiegata.

Ou te muai faatulou atu i le paia maualuga o le Maota Fono o Samoa i le afio o lau Afioga i le Fofoga Fetalai o le Maota, afio lau Afioga i le Sao na Faapito i Atua, lau Afioga Fiamē Mataafa Mulinuu II. O oe lava o le lupe na faia mai le fuifui o lau Afioga na filifilia faapitoa e Samoa e fai ma Taitai o le tatou sa i lenei 5 tausaga. Lea foi ua e faatuina se tasi o matatia ausia gata, o le uluai Palemia Tamaitai i totonu o Samoa ma le Pasefika.

Afio lau Afioga i le Sui Palemia, afifio a outou Afioga i Alii ma Tamaitai Minisita o le Kapeneta. Afifio a outou Afioga i Minisita Lagolago. Ou te faatulou atu foi i le paia o le Matagaluega o le Fono, i le susu o lau Susuga i le Failautusi faapea le paia ma le mamalu o le Matagaluega.

E faatulou atu foi i le susu mai ma le afifio mai o Ofisa Sili o Pulega o Matagaluega faapea Faalapotopotoga Tumaoti a lo tatou Malo.

Lau Afioga i le Fofoga Fetalai, e le faagaloina le tapuaiga mau a Samoa. Ou te faatulou atu i le afio o lau Afioga i Le Ao Mamalu o le Malo o Samoa,

lau Afioga i le Tama a Aiga, o le Tama Tauaana, lau Afioga Tuimalealiifano Vaaletoa Sualauvi II. Ou te faatulou atu foi i lau Afioga i le Sui o le Fono a Sui Tofia lau Afioga Le Mamea Ropati ma lou faletua.

O le paia lava lea aua le afio o Tama ma Aiga, o Aiga foi ma Tama, o Aiga o Tupu, Aiga o Nofo, Aiga o Papa, o Aiga na Tafaitoa i ai Samoa, ae polapui e le Usoga a Pule ma Tumua, Ituau ma Alataua, Aiga i le Tai ma le Vaa o Fonoti.

Lau Afioga i le Fofoga Fetalai e le faagaloina foi le tapuaiga a nai o tatou uso i le motu i Sasae. I le afio o lau Afioga i le Kovana Sili, lau Afioga i le Kovana Lutena, afio lau Afioga i le Peresetene o le Senate, lau Afioga i le Fofoga Fetalai ma Maota e Lua. O paia ia o lou faleagafulu aua Sua ma le Vaifanua, o Fofu ma Aitulagi, Saole ma Saleaamua ma le Launiu na Saelua.

Ou te faatulou atu foi i le Laau na Amotasi ma Faatuiolemotu, Auvaa o Tootoo ma Usoalii ma upu ia te oe le Manuatele.

Ou te faatulou atu foi i lau Afioga i le Faamasino Sili, aemaise o alii ma tamaitai o le Faamasinoga ma le Matagaluega. Ou te faatulou atu foi i le paia faale-Talalelei, i paia aua le susu o Taitai o Ekalesia Kerisiano uma i Samoa i Sasae ma Samoa i Sisifo nei. Ou te faatulou atu foi i le nofo a faafeagaiga i so o se fatafaitaulaga o lo o outou faafalelemalu ma faatunapaulia ai aua le feau ma le galuega a le Atua. O lea lava o lo o outou asuina le vai o le ola ina ia tupu pea le filemu, tupu pea le alofa o le Atua i loto ma agaga o si o tatou atunuu pele o Samoa.

Lau Afioga i le Fofoga Fetalai, e tumau pea e mausali foi le talitonuga o le Itumalo lenei, o Samoa e faavae i le Atua. O le a le fitifiti o le a le siisii, o le a foi le lukaluka o le fetalai ma le fefatiai o peauvale o le gataifale, o lele lava ua nofofale ia Satuiamaa le Malelega a Malietoa, “Samoa, o le aso nei ua ou fultua ai i au o taua, i au o fili ma au o tupua, ae o le a galulue faatasi Aiga, o Pule ma Tumua ma le galuega pele a le Atua.”

O ou paia sauoo ma ou mamalu sautuafafafa na Samoa e amata mai i le taisamasama o le Tuimanua seia paia Fili ma Puletuu na tauilo ai manu o Malo. Tulou, tulou, tulouna lava.

Ia lau Afioga i le Fofoga Fetalai, o le a avea ia lenei itula se i ou faapai atu i si ou itumalo pele o Gagaifomauga Nu.2, o i latou o le Pule na latou tofia ma filifili mai au se i ou sau i le Maota Fono o Samoa. Ia, talofa si ou itumalo pele o Gagaifomauga Nu.2. E le mafai, le mafai ona faagaloina Afia i si ona vao.

O upu o le Tusi, “Ierusalem e, afai e galo oe ia te au ia galo lava i lou limataumatau, afai ou te le manatua oe, ia pipii ae lou laulaufaiva.”

E muamua ona ou faatulou atu i le paia o le aufaigaluega tofofi a le Atua o lo o outou faafalelemalu ma faatunapaulia i totonu o si o tatou itumalo. E momoli atu lau faafetai tele i la outou tatalo ma la outou faanonogamanu aua se manuia o si o tatou itumalo, aemaise o lea ua ae manuia ai faiva o la outou auauna.

Ou te faatulou atu i le paia o si ou itumalo. Mo le silafia e 6 afioaga o lo o i ai i totonu o si ou itumalo. Faatulou atu i si ou afioaga o Paia. O paia lava ia aua le afio o Sa Peseta, aemaise o le toafia o alii, susu mai Faalogou o le foe na tuuese, maliu mai Mausautele faapea lau Fetalaiga Mauai.

E faatulou atu i lou afioaga o Samauga, aua le afio o Sa Peseta, maliu mai lau Fetalaiga Sooalo faapea le mamalu ia te oe Samauga.

E faatulou atu i si ou afioaga o Lefagaoalii, o paia aua le Aiga Sa Peseta, afio le nofomatua ia Tuu ma lou faleagafulu ma le falelima o alo o Nai. Afio mai Malaitai ma Usoalii ma le Faletolu, afio mai Tuailemafua ma Usoalii ma Tamapaa, afio Fuimaono ma Usoalii faapea le mamalu i le falefa o Samauga.

Si ou nuu pele o Matavai, aua le afifio o le Toafa o Alii, alaalatai lau Fetalaiga Tuumatavai, Paiaaua ma Afaese ma le nofo a ituaiga. O oe lava o le malu o Safune.

E faatulou atu i si ou afioaga o Faletagaloa, o paia aua le susu o le Tagaloasusu, afio le alii o le nuu, ae alaalatai le toafia o tulafale ma lo la toalua faapea le mamalu ia te oe Safune ma Taulauniu.

E faatulou atu foi i si ou afioaga o Fatuvalu aua le afifio o Tapaau faapea le mamalu o le falefa o saausi.

Lou itumalo pele, o lea ua outou faapale la outou auauna i la outou faaeaea ma la outou puleto, o lea ua ou inu malie i lau faaaloalo maualuga, aua o ai na manatu o le a outou sii le fale o Asomualemalama i le mauga. Faamalo le pule faa-Tumua, faafetai le lufilufilimalelei. E momoli atu lau faafetai tele i le saofaiga a saoa ma saotamaitai, o faletua ma tausi, o aualuma, aemaise le aumaga o le malosi o si o tatou itumalo. O lea ua ou tiu faamatalaoa, ua ou sapi ma oaoa i faleseu ma saa i maaomalie i la outou pule ua toto tetele ma ua ou sapaia faatuaelele. Faafetai, faafetai, faafetai tele lava.

E le faagaloina foi le agaga faafetai lau Afioga i le Fofoga Fetalaiga i nai ou uso sa matou tausinio aua se sailiga o se sui mo le nofoa o le itumalo. Lau afioga Manuta Lavamaile, lau afioga Sooalo Mene, lau fetalaiga Peauala Titi aemaise o lau fetalaiga Lepailetai Ieti Tifaga. O le upu moni, e taaalo lava tama a o le uso. Ae ou te momoli atu le faamalo tauivi, malo finau, faafetai le taaalo faatausala. O upu e masani ai, e a au nei, ae a oe taeao.

E le itiiti le agaga faafetai o lou nei sui usufono e fia momoli atu i lau Fetalaiga Sooalo Mene, o lau tautua matavela sa e togi le maa ma velo le aso aua le fausiaina ma le faufauina o le Maota o Samoa, a o se sao aoga o le ta itumalo aua le Malo o Samoa. Malo mo galuega lelei ua uma ona e faatino, malo foi le finau mo isi galuega o lo o faaauau pea, a o e pale mai i Paeaiga sosoo e lua. O a lava faaletonu ma ni feeseeseaiga sa ta i ai i le taimi i fogalemalo, ou te talitonu o i ina na toe faamanatu mai ai ia i taua, o le polokiki lava e mavae, ae ta te o ifo i le tuugamau ma o tatou sootaga e faavavau aua e mafanafana lava le toto o mea nei o aiga. Ia faamanuia le Atua i faiva ma tofi o le a faaogaina ai lau Afioga.

Lau Afioga i le Fofoga Fetalai, talu ai o so matou taimi muamua, e le mafai ona faagaloina nai tuua sa latou asa maia le vaofilifili, o e ua faailagi le latou folauga, ua taoto mai i malae o i latou sa latou asaasaina le gasu o le taeao. Sa latou taumafai se maa e togi aua lou oo mai i totonu o le Maota o Samoa. E le faagaloina lo latou sao, e momoli atu le faafetai. Ma ou te talitonu, o le nofoa lea ou te nofo ai, o lo o i ai faatasi ma agaga o i latou sa asaina le gasu o le taeao.

Si ou itumalo pele ua le mafai ona ou maua suafa o i latou ae o lo o i ai lagona e tumu i le faaaloalo, e manatua lo latou sao aoga aua le fale o Samoa.

E faapea foi ona vaavaai atu i lea itu i le mamalu mai o fofoga o i latou o e na taumafaia le mau a Samoa ma tau taitai Samoa ina ia maua sona tulaga i faigamalo a le lalolagi. E le faagaloina la outou tautua. Ma e momoli le faafetai a lenei itumalo i la outou tofa saili ma la outou faautautaga loloto sa outou taumafaia ai se tutoatasi o Samoa. E le galo lo outou sao i lenei itumalo.

Lau Afioga i le Fofoga Fetalai, ona ou oo mai lea i le Tala o le Tupe e pei ona taoto nei i le Laulau a Fono. O le Tala o le Tupe ua folasia nei i lumamea, e mafai ona ou faatusaina i se manatu autu, e le faapito Manu ia Tasi. O le Tala o le Tupe lenei, o se Tala o le Tupe ua malamalama ma manino lelei i le faitau o le sui usufono o Gagaifomauga Nu.2. A vaavaai ma le totoa i ai, ua matua oooo lava ia le faasoa a lau Afioga i le Minisita o Tupe i so o se vaega o tagata o lo tatou atunuu. O lea lava ua oo i ai latou o lo o i ai manaoga faapitoa, o lea ua oo i ai lau faasoa. O lona uiga ua lilifa lau faasoa i tagata uma o Samoa. Ua le faapito lava Manu ia Tasi.

O lea ua matau atu i le Tala o le Tupe ua pau pasese o vaa, o lea ua i ai faamanuiaga mo i latou e i ai manaoga faapitoa. O lea ua pau le tau o le eletise pau le tau o le vai. O lea foi ua e faataoto nisi o alafua e tapena ai itumalo taitasi, aua e \$51 miliona mo itumalo uma o Samoa. Ua leai lava se vaega e le i oo i ai le faasoa a lau Afioga i le Minisita o Tupe.

Ou te momoli atu le faafetai i lau Afioga i le Minisita mo lenei galuega. O le talitonuga o le itumalo lenei, e le o le taimi lenei e mafai ai ona o tatou vaavaai i se Tala o se Tupe pe a fua i le ogaoga o nisi o faaletonu ua aafia ai upufai a lo tatou atunuu. E le itiiti le aafiaga o mea tau seleni a lo tatou Malo, aua e tau fetuunai e ala i la outou faasoasoa. O le manatu o lenei itumalo, e fou lau Afioga i le tulaga tofi o le Minisita o Tupe. Aepeitai o le matou vaai, e te le fou i le lufilufiina o seleni.

Ou te faafetai foi i le Afioga i le Palemia, ua tofi se toa e tu mai i le taimi soua ma le taimi faigata o aso faapenei. A lea ua molimau Samoa i lau tolaulauina o le Tala o le Tupe i le aso ananafi malo le faatoatoa. Faafetai le alofa ia Samoa. Ua fetau lelei lou tulai mai ma le tauavameaina o le tamaoaiga o Samoa, aua o taimi faapenei e manaomia ai ni foemua lototetele, ma malolosi e pei o lau Afioga. Ia matou te le selu atu, ae o le tatalo a le itumalo lenei, ia maua pea lou lototele, faateleina le tomai, ma ia

maua pea auupega aua lou feagai ai ma le tau faasoasoaina o le tamaoaiga o Samoa.

Ia ona ou oo mai lea lau Afioga i le Fofoga Fetalai i manaoga o lenei itumalo. O le a muamua atu se manaoga o lenei itumalo i lau Afioga i le Minisita o Galuega, lau Afioga Olo Fiti Vaai. E i ai le talitonuga i le matou vaai atu i lenei itu, e leai lava se Minisita e pito sili ona aulelei e pei o lau Afioga. E atagia mai foi i foliga o lau Afioga le mataataata, ae faaali mai ai le loto alofa ma le loto fesoasoani. Ma ou te talitonu lava, e le i saga tofia lau Afioga e le Palemia e te tu mai i le faafoefoeina o galuega tetele o le tatou Malo aua o oe o se tagata malosi.

Lau Afioga i le Minisita, o lo o i ai nai auala galue i totonu o si ou itumalo, o lo o i ai si afioaga lea o Matavai ua atoa le 20 po o le ova atu foi tausaga, e le i i ai lava se galuega ua faia i lona auala galue. Ae o le tasi lea o afioaga o lo o tafe ai le suasusu ma le meli i ona laufanua. Ma e faatusaina foi ona laufanua ia Etena e ola ai so o se laau ma so o se tamaoaiga.

Lau Afioga, se i silasila totoa ane lau Afioga e le gata i si ou afioaga i Matavai ae faapea foi si ou afioaga o Paia. Sa faatino le galuega i na tausaga ua mavae, ae e le i maea. O lo o gata lava i tai masalo e le atoa se 200 mita o lo o i ai nei. Ae toe manaomia lava lau Afioga e toe silasila ane i ai.

O totonu o si ou afioaga o Lefagoalii, ua tele tagata ua gasolo i le itu i uta e alaala ma nonofo ai ia ona o le faafitauli o lenei vaitau i tulaga o le faaletonu o le tau i le mea sa nonofo ai. Ua tele aiga ua i ai i le isi itu, i le itu Sasae o le afioaga lea o Lefagoalii, ia ae o lo o faaletonu le auala. E le mafai ona o ai ni taavale laiti pe a oo ina tetele timuga ma tafega. Ia ae manaomia lava le faaleleia o auala. O le auala lea e taamilo mai i le afioaga lea o Paia, e mafai ona fesootea ma le auala lea pe a oo ina toe faaleleia a la ua maea ona faaleleia a la ua maea ona faalelei mai ia le afioaga lea o Paia. Ia o le tatalo lena ma le agaga faaaloalo i lau Afioga i le Minisita o Galuega.

O le vaega tau suavai lau Afioga i le Minisita, o si ou afioaga lea o Lefagoalii, ua tele ina nonofo isi i le aena, atonu o lena e te silafia pe a e susu atu lau Afioga. O le tele o latou nei, e leai se ofe a le Malo o taoto ai i lea vaega. Ae o lo o taoto le ofe mautu a le Malo po o le main line i tafaala o le auala i luga i le gatasi. O lo o taatitia ai foi mita a le Malo i autafa o le tafaala, ae o lo o tai lava e le aiga ia le latou paipa agai i lalo o le vaega o lo o alaala ma nonofo ai. Ia o nisi o aiga o se asiasiga ua oo lava i le 50 ofe ua o latou faatauina ia ma tai ai ia si a latou vai, ina ia oo ai i le vaega lea e nonofo ai.

O le faafitauli, o le tele o nai aiga nei, e le iloa atu le faaleagaina e manu tataa ma meaituaolo i o latou ofe ona e fai si maomao. O le ala lea e tele ai ia latou pili o paipa i nisi taimi, e latou te le o iloa atu, aua e ui mai i isi aiga ia o latou ofe mo le suavai. Ia o le mea lea lau Afioga i le Minisita o Galuega, se i silasila ane i ai lau Afioga ia ma le mamalu o le Matagaluega.

O lo o i ai se fuafuaga a le Ofisa o Faigafaiva ma Faatoaga, i se faasao e faia i totonu o le vaituloto i si o matou itumalo. Ae o lo o i ai se aualalaupapa sa mafai ona kolosi ai i le isi itu o le vai ua faaleagaina e matagi malolosi o Ofa ma Valelia. Ia e tatalo atu, a i ai se avanoa o lau Afioga, ia ona se i silasila ane lea. Ia ae e le tele lava se tupe e toe alu ai i le faiga o se aualalaupapa ina ia faafaigofie ai ia faamoemoe o le Ofisa o Faigafaiva aua le faamoemoe lea o le faasao. Ia o le tatalo atu lea ma le agaga faaaloalo, aua ou te talitonu o faiga faavae a lo tatou vaega faaupufai, o le laugatasia o tagata uma, ma itumalo uma i fesoasoani a lo tatou Malo. Ia o le ala lea e tatalo atu ai ma le loto maualalo, ia se i alofagia ia lea vaega ina ia faafaigofie ona fai lea faasao mo le fofoga taumafa o le itumalo, ia aemaise foi o nai afioaga o latou lalata ane.

Ia ona oo mai lea i lau Afioga i le Minisita o Tina ma Tamaitai. E momoli atu le faafetai tele i lau Afioga i le Minisita, malo mo galuega lelei o faatino. E ui lava e le i iloga so tatou tulai mai, e le o leva ona o tatou tulai mai, ia ae o lea lava ua vaavaai i suiga lelei i taumafaiga a lo tatou Matagaluega. O le tatalo a lenei itumalo ma e molimauina o lau Matagaluega, o le faitotoa lea o nuu ma afioaga agai i le Malo, ae faapea foi ia le Malo agai i nuu ma afioaga. E i ai foi le manatu o lea ua faaaogaina e le tele o Matagaluega o le Malo, sui o nuu ma sui tamaitai, e faaauala atu ai ia ni polokalame ma aoaoga. Ia o le mea lea e momoli atu ai le faafetai ma le faamalo ae o le tatalo, aua matauina i lenei vaitau le ofi mai o le ituaiga pusaapa foi lea e le mafai ona taumafaina e le toatele o lo tatou atunuu. Ae o le tatalo, e manaia foi le faaauala atu i lo oulua Matagaluega se tuualalo i le tele o nuu ma afioaga, e tatai ona taofi le faaaogaina o pusaapa nei i faalavelave. Ia ma le tele ai fua o mea e felauai i taimi o faalavelave.

Ia e faaleoina foi le agaga faafetai i lau Afioga ona o lea ua matauina o lea o le a faamatuu atu i lalo o lau Matagaluega ia le \$11 miliona, aua le tapenaina o itumalo taitasi o ni auala aemaise foi o ni fuafuaga talafeagai aua le faamatuu atu o le tatou \$51 miliona, i le tausaga fou. Ia o le tatalo a lenei itumalo, ia ua tatai foi ona amata le faasoa i itumalo, ia aemaise foi ia aua ne i faafaigataina criterias e manaomia. E lelei lava ona faafaigofie ina ia vave foi ona galulue ia Komiti aemaise foi ia itumalo taitasi, ia vave ai ona oo mai i totonu ia latou tapenaga, ia aua le silasila a lau Afioga ma le mamalu o le Matagaluega i tulaga e manaomia vave ao le i aulia lena tausaga. Ia o le tatalo atu lea ma le agaga maualalo i lau Afioga i le Minisita o Tina ma Tamaitai.

Ona ou oo mai lea i le Minisita o Eleele lau Fetalaiga Leatinuu, ou te talitonu lava o oe le isi Minisita e tumu i le loto alofa. Ia o oe foi e te foliga e te matasaua, ia ae e te alofa lava i si au fanau. Ia o le agaga o lenei itumalo, o lo o i ai eleele a lo tatou Malo sa saili ae lea fai mai o lea ua i lalo o lau Matagaluega ae o eleele lea sa i lalo o le Esetete Tausi lea e... fanua lea e taua o Ologogo. O le fanua lea, pe a ma le 1,600 eka lona tele, ae pe a ma le

40 po o le ova atu tausaga, e le o toe faaaogaina i ni atinae a lo tatou Malo. O le tatalo a le itumalo ma le loto maualalo, afai ua le toe faaaogaina i ni atinae a lo tatou Malo, pe a le finagalo pe tefaletauuala, ae toe faafoi maia eleele o si o matou nuu ma si o matou itumalo e matou te galulue ai e atiae le tamaoiga o si o tatou atunuu. Aua o le tele lava ona taatitia i tausaga e taatitia ai, o le tele foi lena o le le faaaogaina. Ae a faamatuu mai e matou te galulue ai, e vave foi le tali mai i le tamaoiga o le tatou atunuu.

O le fanua lea lau Afioga i le Minisita, o le mau a nai o matou tuua i aso ua mavae, o le fanua lea sa fai ma lau atu i ai ia manupapalagi a lo tatou atunuu a lo tatou Malo i lena vaitau. Afai la e paeae vaeatu le Maota, ia manupapalagi a Salega ma Gagaemauga, o i la e avatu e faapepeti mai ai ona o le lelei o le laufanua toe ola lelei ai so o se laau. Ia o le ala lea ou te mitamita ai lava, a toe faamatuu mai i lo matou itumalo, ona vave lea ona vaai lea i se fua lelei i le tali mai e fesoasoani i le GDP a lo tatou tamaoiga.

Ona oo mai lea i lau Afioga i le Minisita o Falemai, lau Afioga Valasi, e momoli atu le faafetai tele e tusa ai ma lau asiasiga lea sa molimauina, taamilo i lo tatou motu i Salafai. Masalo foi ua e silafia i le mafatia ma le pagatia o lo o i ai si o matou falemai i Safotu. O le falemai lea lau Afioga i le Minisita, o lea ua autovaa atu i ai ia le alu atu lava lea i Gagaemauga e faasolo i le Gagaifomauga.

O lo o i ai le falemai o lo o i ai i Vaipouli i le taimi lenei, lea e afio mai ia le Afioga i le Minisita Lagolago Gagaemauga 2, ia faapea foi le Afioga i le Minisita o Tupe Maua. O le falemai lea, ua tele ina le toe afea e gasegase i le Gagaemauga. O le tala na maua, e tele ina faafefe ia nai mai i le po, e le iloa po o ai po o se saualii po o se tagata soifua. Ia o le mea lea ua fai si mamao i uta ia le tulaga o le falemai. Ia ae o le fale e ese le mania toe aulelei. Ae o le ala lea ua gasolo atu ai ia le Gagaemauga i le falemai lea i Safotu. Ia o le tatalo ma le lotomauualalo lau Afioga i le Minisita o Falemai, ia masalo ua e silasila i ai, o moega la e i ai i le falemai, ia ou te masalo ua atili ai ona toe mamai ia nai tagata mamai. Ia ua le gata ina elea, ia ae ua faapea foi ona maluelue ua le toe mausali ma le toe mautonu ai ia le tagata mai pe a taoto ai ma le faaloalo. O lea e tatalo atu, pe a pe a silasila ane i nai moega ia mo si o matou falemai i Safotu.

E i ai le agaga faafetai tele i lau Afioga ona o lea ua i ai le fomai tumau, ae e pau lava lona lau Afioga, e le o atoatoa vaega o meafaigaluega ma vaega e manaomia e faatino ai galuega a le fomai. Atonu o le mea foi lea ua tele ina gasolo mai nisi i Tuasivi ona o vaega ia e le o atoatoa le auaunaga i fomai ia faapea foi ia nai tausii soifua. E tatalo atu ma le loto maualalo, se i tagai ane lau Afioga i nei vaega.

O le falemai i Tuasivi leaga e pei o i lea e ogatotonu i ai falemai o le Motu i Salafai. Ou vaavaai ma le faanoanoa tele i fale o lo o taoto ai mai, a oo ina timuga e susu uma mai. Ae silafia o le nofoaga lea o matamatagi. E fai si savili ae o le tulaga o lo o i ai vaega o lo o taoto ai gasegase, o lo o tele

le faaletonu aua e oo mai foi gasegase o si o matou pito o Gagaifomauga, ia ma le Vaisigano pe a oo ina tigaina. Ia o lea e tatalo atu ai ma le lotomaulalo, ia se i alofagia, toe faalelei ia vaega ia e taoto ai gasegase i Tuasivi.

Momoli atu le faafetai i lau Afioga i le Minsita e tusa ai ma le faagasologa o tui o le Koviti-19. Ua matauina ma le loto faagaetia ia le amata ona see i se isi tulaga ia le faaauauina ina ia tulituliaina pea ia pasene o lo o manaomia, ia aua le puipuiina o si o tatou atunuu. E momoli atu le faafetai i le faateleaiina ma le faatelevaveina o tulaga e faagasolo ai ia tatou tui puipui. Ia matauina foi i faasilasilaga o le Pule Sili o Maota Gasegase po o le Soifua Maloloina, ua lalata ina expire nisi o tui. Ia, e a le tefa le tauala i lau Afioga i le Minisita, ia ae fai se isi faiga foi lea e vave ai ona faagasolo le tui, ia ae fai se tatou lockdown i se isi vaiaso, ia ae faaalu tui ina ne i vave ona expire ia ma maumau le fesoasoani mai nisi atunuu sa alolofa mai. Ia aemaise o le tau tulituliina o numera e tatau ona faamalieina ai ia le saogalemu o le tatou atunuu. Ia o le tatalo atu lea i lau Afioga i le Minisita o le Soifua Maloloina. Alofagia e le Atua ia maua pea lou malosi.

Ia oo mai lea lau Afioga i le Fofoga Fetalai i le Minisita o Faatoaga ma Faigafaiva, ia lo tatou itumalo ua outou faafofoga mai, ia o lea ua ou i i i le fatu o Samoa. E leai se mea e tou te popole ai, o lea ua ou i ai i le Matagaluega na mafua ai ona outou aumaia au i totonu o le Maota lenei, ia ae faatali mai.

Lau Afioga i le Minisita momoli atu le faafetai i le tulaga o le faagasologa o polokalame aua ia le tatou Matagaluega. Ua molimauina le tele o nisi vaega ua laasia i ai le taumafaiga ina ia faaoo le fesoasoani ia aua nai tagata faifaatoaga ia aemaise o faigafaiva. Malo faafetai e le tau selu atu, leaga o lau Afioga foi o le faifaatoaga numera tasi i lo tatou itumalo. O le mea lea ia tumau ai pea le malosi e faatino ai ia galuega lelei ia aua le mamalu o le aufaifaatoaga. Ia ma e i ai lava ia le talitonuga, o le vaitau ua alu ma aso ua alu, o le ivitu lea o le tatou tamaoaiga o faatoaga.

O le toe lalagaina o faatoaga i so o se ituaiga, o le tali foi lea i le tamaoaiga o lo tatou atunuu. O lea ua matauina i le tatou anavatau i fuafuaga alualumamao aua le \$51 miliona mo itumalo taitasi, ou te manatu o le 50% o le \$51 miliona lea, e agai i le aufaifaatoaga i le faaleleia o tulaga tau le atinae tau faatoaga ia ma tulaga mo mea faapena. Aua o si o tatou atunuu aemaise o matou i Salafai, ia o matou e feala ae loa i le taeao e lua lava itu e faasaga i ai. A le faasaga i le sami ua faasaga i uta i le vao. O le sailiga o le tamaoaiga, e saili i le vaomatua ma le gataifale. O le mea lea e momoli atu ai le faafetai, e matauina le agai i luma o le taumafaiga aua le toe faaleleia ia tulaga tau faatoaga.

Ia lau Afioga i le Minisita o Fesootaiga, malo le galulue faafetai le faatoatoa mo galuega lelei. Ia matauina foi le taumafai atili aua lava le faaleleia o fesootaiga e le gata i totonu o le tatou atunuu ia ae faapea foi le va i fafo. Ia

o lo o i ai lava nai fesili e fia tuuina atu i lau Afioga i le Minisita o Fesootaiga. O lo o fia tuuina atu po o le a se tulaga o lo o i ai ia le tatou Wifi sa faatino i na tausaga ae sa toe teena mai po o le a se tulaga ua oo i ai. E ala la ona talanoa atu i le tatou fesootaiga lea, ona o se tasi lea o fesootaiga o lo o manaomia tele e fanau aoga, aemaise lava i matou i Savaii ia ma nuu i tua, ona ua saosaoa lava le alu a nai fanau aoga i totonu i le taulaga, ia ae o lo o tuai lava ia matou i Savaii. Ia o le ala lea po o le a se tulaga ua i ai le tatou Wifi pe toe faaaauau ia pe faaaauau foi ia le saoloto o le faaaogaina, ia pe faaaoga fua. Ia o le agaga lea e toe fesili atu ai, ia afai e toe faaaauau ia manaia foi ae saoloto pea le toe faaaogaina i totonu o aoga. Ia ae o lo o i ina lava le tofa i le tulaga e tapuni ai ia le vaega e le tatau ona oo i ai le silasila a fanau.

O le vaega lona lua e fia fesiligia ai lau Afioga ia o le tulaga i a tatou falemeli. E maua i na tausaga ua i ai se fuafuaga a le Malo talu ai e faatau ese ia le tatou falemeli. Ia ae fesili atu ma le agaga mauualalo ia po o le a se tulaga o i ai le tatou falemeli. Ia ae i ai ia lou talitonuga o le isi aseta aoga lea a le Malo, e tatau lava ona i ai pea i lalo o le faamalumaluga a lo tatou Malo ia le falemeli e tua i ai la tatou faigamalo.

Ia ona ou oo mai lea i le Minisita o le MNRE, po o le tatou siosiomaga. O lo o i ai nai fanua faasao lau Afioga i le Minisita, matauina o nisi o eleele o lea ua faamatuu atu i lalo o le tatou Matagaluega. Ia o le vaavaai ma le fiafia i lenei vaitau ma le alualu i luma o taumafaiga aemaise o le tatou falaoamata lea ua taua mai e le Matagaluega lea a Faatoaga, ia pe le aoga foi ia nai fanua ia e faasao, o lea ua tele ina toto e le Matagaluega o Faatoaga ia koko ma niu ia ma isi ituaiga laau aoga e fua mai, ia ae faaaogaina ia tatou eleele ia e manaia ae fai ai le faasao ia o ulu, ona e i ai le talitonuga o le tasi lea o tatou oloa o le a tatou vaavaai i le lumanai i le tele o lona sao i lo tatou atunuu. Ia e manaia pe a faaaoga i nai faasao faapena a le Malo, faasao ai ulu, ia faasao ai isi laau aoga e aoga i tatou oloa e fausia nai lo le toe toto ai foi o isi koko ma isi laau i faasao lava ia a le Malo.

Ia ae i ai le talitonuga ia ua lava le Matagaluega o Faatoaga ma isi e latou te atinaeina ia vaega ia. Ua matauina foi e i ai isi eleele o faaaogaina e turisi vaavaai foi e le o faaaogaina, ia ae manaia o lea ua o tatou agai e atiae ia nisi o oloa fou a lo tatou atunuu, ia ae faaaoga mai ia o tatou eleele ia e fai ai faasao o lo tatou atunuu, e faigofie ona agai i ai ia lo tatou Malo, pe afai o faaletonu mai ia o tatou tagata. Ia aua e i ai le talitonuga o ulu ia vaeatu le paia o le Maota, ia o le laau e ola solo. E tele ina le faaaogaina ia le tele o ulu mai i tua, ia ae lelei ona faaaoga ia o tatou faasao e faigofie ona fai ia togafitiga mo le lelei atoatoa o le tatou oloa lea e fia fausia ai.

Ia aemaise o le... e i ai si ou pitonuu i Fatuvalu o lo o i ai le vai o lo o i ai ona autafa, o le vai lea e aoga e faasao ai o le ia o le tilapia. Ia e talatalanoa foi i se tasi e i ai sona tomai, e aoga le vai lea e faasaoina ai se faasao lea i totonu o si ou itumalo. E fai si tele o le vai lea e pei se faataufusi, ia ae

faigofie ona agai i ai le toatele o lou itumalo faapea foi itumalo o lo o taulalata ane. Ia se i silasila ane i ai lau Afioga i le Minisita.

Ia ona ou oo mai ai lea i le Minisita o Leoleo, momoli atu lau faafetai i lau Afioga i le Minisita o Leoleo, e i ai lava le talitonuga e le faigofie le galuega. E momoli atu le faafetai i le Komesina ma le mamalu o le Ofisa o le Malu o le Malo, i la outou galuega e le faigofie. Vaavaai foi i lenei vaitau i le tulaga o le faaletonu o si o tatou atunuu, faafetai mo la outou puipuiga malu.

Faafetai i lau Afioga i le Minisita e i ai le falemai e auala mai ai le mana laveai o le Atua, ae o la outou Matagaluega, e auala mai ai le mana o le filemu o le tatou atunuu. E auala mai i le Atua le filemu. Ia o le mea lea e momoli atu le faafetai. Ia e pei lava ou te talitonu o le tele o nisi o ofisa i tua o le tatou Matagaluega, e le o lelei ia ona ofisa. E i ai le Ofisa o lo o i Fagamalo, ia o lo o matauina foi e le o lelei tele le faatinoga o Ofisa e faatino ai galuega. Ia aemaise o auala se i toe silasila ifo ai, ia o le tele o isi lala o le tatou Matagaluega i tua, e le o lelei taavale o lo o feoai ai.

E ala la ona fai atu se faamatalaga, a i ai ia faafitauli e tutupu i taimi o le po, o le alofaga lava lea e alo i ai ia le Matagaluega, e leai ni taavale. E le lava taavale ae manaomia le fesoasoani se i toe silasila ane i ai lau Afioga, ia pe sao le tala o maua, ia ae pei o le alofaga lea o lo o maua. Ia aemaise foi o le faamamaluina o Tulafono e pei ona taua e se tasi o sui usufono, o lo o atagia pea o lo o i ai ia moli faaopoopo i taavale. Ia ae o se tasi lea o faafitauli o tupu mai pea i le taimi lenei. O lo o matauina ai le faaleagaina ai o fofoga o nisi ma tupu ai faalavelave fetoi taavale vaeatu le paia o le Maota. Ia aemaise foi o pu o taavale nei, ia ua i ai ia nisi o pu faaopoopo a ee ia e pei ona avatu e se tasi o sui usufono, ia e popole i le aumatutua. Ia aemaise o taimi o faigalotu, o lo o matauina nisi o laau faaopoopo laaupese, ua faatalutalua i le tele o afioaga. E le gata foi i Savaii ae faapea foi le taulaga. O le mea lea se i toe silasila ane lau Afioga i le Minisita se i toe faaoo atu i ai le silasila ina ia malupuipua pea le mamalu o le tatou atunuu.

Ia lau Afioga i le Fofoga Fetalai, ou te iloa e pau ia o manaoga o si o matou itumalo, ia ae tatalo atu pea i le paia o le Kapeneta, ia masalo o lea ua le toe i ai le tamaloa foi lea o taatia mai. Ia masalo ua tataua ona nofo i ina i lo outou ituvai ia le tamaloa e igoa ia failoa. Ia o le tatalo ma le agaga maualalo, ia se i vave ona silasila ane i manaoga o lenei itumalo.

Ia e le itiiti le agaga faafetai o lenei itumalo e momoli atu i lau Afioga i le Palemia. O oe lava o le taitai o ituaso faapenei, ma e amuia foi lenei Paeaiga o lea ua tu mai se kapeteni e toamalie. O upu lava e masani ai le atunuu, e le iloa se tautai i aso malu, ae e iloa i aso e soua ma matagia. E momoli atu le faafetai a lenei itumalo e tusa ai ma le taitaiga o le tatou savaliga, na o tatou savavali mai ai. O lo o faaalua pea lo tatou naunautaiiga ma lo tatou anavatau, e tatou te sosolo lava i le Tulafono. Ma e tatou te talitonu foi, a tatou ola i le Tulafono, e mautinoa le solo lelei ma saogalemu o fuafuaga fai a so o se faalapotopotoga aemaise o le Malo. Ae a fai loa i le pule faitalia, ona tatou

vaavaai lea i faafitauli, aemaise o le le saogalemu ai o le tatou atunuu. Faafetai i lau taitaiga, e iloa lava le tupu i aga faatupu, ma e le tauilo foi taga a tamalii, malo le faatoatoa, malo le toa i lau Afioga. O le tatalo a lenei itumalo, ia saga faafualoaina pea e le Atua lou soifua ma ia pouliuli lou tino ia malamalama ou fofoga. A o upu a le Atua ia Iosua ina ua tofia e fai ma taitai o le nuu, “Ia e faamalosi ma lototele, aua e te fefe, aua o le Alii lou Atua o lo o ia te oe i mea uma e te alu i ai.”

Lau Afioga i le Fofoga Fetalai, ou te faamalulu atu i le paia o le tatou Maota, afai ua i ai se upu ua sala ma ua le tautamalii i le faafofoga a le paia o le tatou Maota, e potu lava le tautai ae sese lana atu i ama.

Ona ou faai atu lea o se faamatalaga a lenei itumalo, e matua lagolagoina ma le loto faafetai le Tala Faatatau Autu o le Tupe 2021/2022.

Faamanuia tele le Atua i lau Afioga i le Fofoga Fetalai, maua pea lou malosi ma lou lototele, aua le taitaiga o le Palemene o Samoa mo lenei Paeaiga. Faamanuia le Atua i lau Afioga i le Failautusi o le Fono ma le Ofisa ma le Matagaluega. Faamanuia tele le Atua i a outou Afioga i Ofisa Sili o Pulega o Matagaluega, ia maua lo outou onosai, maua pea lo outou malosi aua le feagai ai ma galuega faatino a le tatou Malo. E i ai le talitonuga e tua atu le Kapeneta ia te outou, faamanuia le Atua i lo outou tulai mai i tofi ma tiute ua valaauina ai outou, ia i ai manuia o le Atua.

Ia faamanuia le Atua i lenei Palemene, faamanuia le Atua i le tapuaiga a Samoa o lo o tapuai mai, ae ola le sui usufono mo Gagaifomauga Nu 2 i le alofa ma le agalelei o le Atua. Faafetai.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Gagaifomauga Nu 2.

FOFOGA FETALAI: E avatu le agaga faafetai o le Nofoa i le sui usufono mamalu o Gagaifomauga Nu 2, faafetai mo le saunoaga, o lea lava ua manino lau saunoaga i le afioga i le Palemia ma le Kapeneta, aemaise foi o lou lagolagoina o le tatou Tala o le Tupe. Aemaise foi o lea foi ua faafofoga faavaaotutui le paia o Samoa aemaise o lou itumalo i lou finagalo faaalua aua lava le atinaeina o le itumalo. O lea foi ua maua le agaga o le faafetai o le itumalo, i le filifiliga o lau afioga. O le mea lea faafetai tapena malo le lauga.

O lo o totoe lava lo tatou taimi, e manatu foi o lo o avanoa foi lenei taimi, mo se tasi o sui usufono o lo o fia saunoa, o lo o totoe lava le tatou taimi.

O lea ua matau atu o lea ua tulai mai le sui usufono mamalu o Vaisigano Nu 1. O le avanoa lea o lau Afioga i le sui usufono mamalu, Minisita Lagolago.

Afioga NIUAVA ETI L MALOLO (Vaisigano 1): Faafetai i lau Afioga i le Fofoga Fetalai. O Lau Afioga, o le sulu lea i ou vae ma le malamalama i ou ala, na ou tauto, ou te faamaoni foi, ou te tausi i au faamasinoga tonu.

Ua matuai puapuagatia au, le Alii e, ia e faaolaola mai ia te au e tusa ma lau Afioga.

Lau Afioga i le Fofoga Fetalai, o lea ua talatuu siutafaoga i le tofa manusina ma ua laolao ai i fale lenei avanoa faaauuro, se i faailo ai se lagona o lenei foi usugafono ma lenei itumalo. E vaeatu le faalepa o le vaatele i le Fonousu a le Palemene o Samoa, ae tainane le tapuaiga mamala a si o tatou atunuu. Ae paga lava lea, e manao i le ufi ae fefe i le papa, e momoo foi i le lupe ae fefe i le gataula. O le ala lea o le tau faaofi o se leo o lenei itumalo se i faalanu le tapui, ma togi le aute i fanua, e faigata lo tatou taeao ua tepa i ula ua tagai i ula, ua futifuti a manuula ma ua sasala foi le nanamu o le alofa o le Atua. Ou te muai faatulou, tulou tulouna lava.

Tulouna ia le malae i Tiafau, o le malae o le faautugatagi a aiga ma a latou tama, a o le tupua na matie ai le atifetalai ma le faasau. Na faatili i le matagi aua le usoga a Pule ma Tumua, Ituau ma Alataua, Aiga i le Tai ma le Vaa o Fonoti.

Ou te faatalofa atu i lau Afioga i le Fofoga Fetalai o le Palemene Lona XV11 a Samoa, i ou feaoga ma lou tautapa faalupea, i ou mailiili faaepa, o oe e tua faasagamau i ai navenave ma lilipi tialogo i ai le toau ma nunu o le Palemene.

Lau Afioga i le Palemia filifilia, o oe lava o le too taumua ma le too taumuli o le taoama e matua i ai le tuu, aua le Palemene ma Samoa.

E faatalofa i le saofaiga a le Kapeneta ma Minisita Lagolago, le mamalu o le Palemene o Samoa. Susu susuga i Ofisa Sili o Pulega i Matagaluega ma Faalapotopotoga Tumaoti, le Failautusi ma le aufaigaluega o le Fono Aoao Faitulafono.

Ou te faatalofa foi i si a maua Matagaluega o Galuega, Felauaiga ma Atinae Eeseese ma le tatou Sector, malo le ati, faaauau pea le faamaoni ma le alolofa i le Atua.

E faatalofa atu aua le nofo tapuai a lau Afioga i Le Ao Mamalu o lo tatou Malo, lau Afioga Tuimalealiifano Vaaletoa Sualauvi II ma lau Masiofo. Ae o le soo taualo foi a lau Afioga i le Sui o le Fono a Sui Tofia, lau Afioga i le Suafa, lau Afioga i le Suafa Hon Le Mamea Ropati Mualia ma lou faletua. Ae a le tapuaiga mamalu i Tama a Aiga, i lau Afioga Tui Atua Tupua Tamasese Efi ma lau masiofo. Lau susuga i le Malietoa ma lau masiofo, a o le paia i Tama ma Aiga, Aiga ma a latou Tama, Tumua ma Pule Ituau ma Alataua, Aiga i le Tai ma le Vaa o Fonoti.

Tulouna lau tapuaiga i lau Afioga i le Faamasino Sili ma le Ofisa o Faamasinoga.

E manatua foi le tapuaiga i le la ituvai, le paia maualuga i le Faleagafulu ma le Manuatele, aua le susu o Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Laau na Amotasi ma le Faatuiolemotu, ae a le Tootoo o Faleula.

E faatalofa foi i le afio o le Kovana Sili ma le Kovana Lutena, afio mai lau afioga i le Peresetene o le Maota maualuga, le Fofoga Fetalai o le Maota o Sui ma le Tafatolu o Faigamalo a Tutuila ma Manua.

E le faagaloina le tapuaiga i ulu o Ekalesia eseese i Samoa, ae a le faanonogamanu i auaua o le talalelei o lo o talafaauto i itu e fia o Samoa ona o le valaauina a le Atua, ua faamalo le soifua laulelei.

Faafetai i lau Afioga i le Fofoga Fetalai. O le viiga ma le faafetai i le Atua, o le Atua e faavae ai Samoa, e le faaitiitia i aso faapenei. O le talitonuga o lou tulai atu i le aso i luma o lenei Maota Fono mamalu, ona o lana valaauina ia te au. Faafetai tele le Atua i au meaalofo e ala i lenei tofiga. O lau tatalo faatauana, ia e fesoasoani mai ia te au, i le faatinoina o lenei auauana, ma ia aua, aua, aua lava ne i ia te i matou, ae ia foi pea le viiga ia te oe, o le Atua o Sapaota.

E le mafai ona galo taē o i Atua, i le paia ma le mamalu o si ou itumalo o lo o tapuai mai, o Vaisigano Nu 1. O lenei itumalo e fou le tulai atu o le sui usufono, ae ua elea vae o le Nofoa o le itumalo i le Maota i Tiafau nei. O le afioga i le Aloalii Vaai Kolone, sa avea ma uluai Palemia, a o i ai le taitaiga a le Vaega Faaupufai o le HRPP. O le suli tau manava o le sui usufono o lo o tulai atu. Peitai, ua manatu lo matou itumalo i lenei foi vaitau ma lenei Paeaiga, ou te amatamea e lalaga se isi matalalaga.

Tulouna ia le malae i Matia ma Matia Ituau, aua le afio o aiga, afio mai Tufuga ma le Aiga Sa Tufuga, afio mai susu mai Masoe ma le Aiga Sa Masoe. Le falefa o le usoalii, ma maliu mai Salafai na ituala e lua le Falefia ma le Siuolefanua. Le vagana a Mu'a ma Fao ma le pule a Vaisigano. A lele ua silasila ua fita faafofoga Samoa e ala i le tofa sailimalo ua faamalo faafetai.

E faatulou atu foi i le malaefono i Falefaaea aua le afio o Tapu ma Lealiifano, maliu mai o le toalima ma Safune o faleupolu na tofi e le tupu. Ua inu malie le faleselau i la outou faaeaea. O lenei ua tusia ai le igoa o Niuava i lenei Paeaiga.

Ou te faatulou foi i le malae i Faletagaloa, Safune le tausasala o le malaefono e afio ai le Tapaau, susu ai le Gafa afio ai le Aloalii, maliu mai le taulauniu o Gale ma Tuiasau, maliu mai sa Oloapu ma Safune o faleupolu na tofofi mai i le lagi. Ae a le saofaiga a faletua ma tausi, saoa ma tamaitai, le malosi o le tatou itumalo.

E le faagaloina le mafutaga a Vaisigano Nu 1 i Purisipeni i Ausetalia, le afio o lau afioga i le Taitaifono ma le laulau a fonu. Susu Susuga i faafeagaiga o lupe faalele o faletua e oo lava i fanau. Aua sa outou togi le ale lea ua tau ai lau o le faamoemoe. Faafetai i la outou tofa o le laau taia e le oia, e le oia i matagi o le laau ou te malu ai. O ai Niuava ua outou sii ai le fale o Asomua i le tumutumu o le mauga? Faamanuia tele le Atua.

E le faagaloina foi i le agaga lau faafetai i tamalii ma failauga o lo tatou itumalo, o nai ou uso vaeane outou sa, sa o matou tausinio i le faiga palota.

Lau Susuga Lopao Natanielu Mua, lau Tofa Tuiasau Ueese Petaia, sa ofoina mai foi o outou soifua e fia tautua i lo tatou itumalo e ala i le faiga filifiliga. Ou te manatu o lea ua tu matila le finagalo o lo tatou itumalo, ma ua agai mai i si ou faatauvaa e asu se ipuvai aua lo tatou itumalo.

E avea foi lenei avanoa ou te faafetaia ai ou aiga i Vaisala, Auala ma Asau, i la outou lagolago. Faafetai i si ou tina o lo o faafofoga mai i Savaii, malo le tapuai. Ae le mafai ona galo le tapuaiga a si ou toalua o lau maasoama, o le auro taugata, you are the number one, and there is no number two, Sunetui Faauuga Aloe ma si au fanau, malo le talitiga, ua manuia ma ua tau le ai o tapalega.

E faapito augafa lau faafetai tele i nai ou tama faaleagaga i le nofo a faafeagaiga ma outou faletua e le gata i totonu o si ou itumalo, a o tafa e fia o Samoa ma le lalolagi atoa. Se faafetai ua tafe tino i vai i le mana o a outou talosaga, ua leai lava se mala e afe, e toia ai lo tatou faamoemoe, e le mafai e se upu momosi a Niuava ona faalanuina la outou galuega faigata. O le tatalo, ia utu tuluipae ma tatala le lagi, faato uaga o faamanuiaga. Tatala la outou mataupu silisili aua le Atua ma lana galuega.

Lau Afioga i le Fofoga Fetalai, o lea ua maea ona ou tapui le vatapuia e tusa ai ma tatou tu ma aga faaleaganuu i ona tulaga faalupelupe, taalolo ia. Ae manatu o lenei itula, o le a se i faailo se manatu o lenei itumalo aua le Tala Faatatau o le Tupe 2021/2022.

Lau Afioga i le Minisita o Tupe ma lou soatau, faafetai i le tala manino o le tupe ua faataatia i le Laulau a Fono. E fia faamauina foi le agaga o le faafetai ona o se matatia lou tulai mai. Ua ou toe manatua ai lava le tala a tamaiti e fai i le apa tuna, se ese foi lava le apa tuna ia. O oe o le apa tuna taugata e le soona fiti i vasa galua, o oe lava o le lupe na faia mai i le fuifui, e ui lava ina e savali i le matuitui ma le faigata ae faafetai o lea ua folasia le Tala Faatatau o le Tupe 2021/2022. E le gata ua faamauina i le talafaasolopito o se uluai Tamaitai Minisita o Tupe i totonu o Samoa, ae o se Tala o le Tupe foi sa tapena i luga o fatiauma soua. Faafetai i le Afioga i le Sui Pule ma le vasega o Ofisa Lagolago ma le galuega na tapena maeaea. E fiafia e faailoa atu, le matua lagolago ina atoatoa e lenei itumalo o le Tala Fatatau o le Tupe ua tuuina mai. Peitai, o le sui usufono lenei mo Vaisigano Nu 1, e le i sau e nofonofo, e le i sau foi e faatalitali na o le ioe, na sau e tilotilo ma mataitu ma taitai ma faafesili, aua le manuia o Samoa.

Lau Afioga i le Minisita, faafetai o lea ua taoto le tai \$200,000 mo itumalo. O le fesili lau Afioga. O fea le tai \$1,000,000 sa o tatou faatino? A o lea ua matau atu ua na o le \$200,000 mo itumalo. Na ou popole lava i seetia i tala fai mai e le taunuu. Ae a? Vaisigano, o lea ua see le vaa o Funefeai, faafetai ua taunuu le pau o pasese o vaa mo Salafai, o se faamamaavega ia i matou e feoi i aso uma. E faafetai o lea ua siitia le \$200 mo penisione mai le \$160 sa sau ai. O se faamamaavega mo nai tina ma tama matutua. Ua faamalo le silasila mamao, e le o se fagogo tagiao. E faafetai ua maua seleni e tausai ai

nai tagata e i ai manaoga faapitoa, e amata ai le polokalame. Mulipola, amuia lou auvaa, o le auvaa o lauia mai le tai loloto ma le sami lanumoana. E pau lava le mea lea e fia faafesili ai, o le 20% lea e pau ai le faaitiitia o nisi o vaega o lo o maua. O le manumanuga lau Afioga i le Minisita, e faapefea ona toe recover le tupe lea mai le 20% ua faaitiitia ai le tala o le tupe mai galuega?

Ona oo mai lea o se faamatalaga i le Minisita o Aoga, lau Afioga Hon Seuula. Ua ou fiafia lava ina ua e pale mai, e le gata o oe o le faiaoga matua ua loa lau tautua, a o oe foi o le faiaoga o le Matematika. Faamolemole lau Afioga, se i toe silasila ane lava i sikolasipi a fanau mo Ausetalia ma Niu Sila. Ua lua (2) tausaga o taofiofi pea tamaiti ona o le faamai. A o lea e matauina o lea lava e gasolo le RSE e o i Ausetalia ma Niu Sila. O le manumanuga o le create o le cap i tamaiti e faauu mai. E le gata i tamaiti nei, a o tamaiti nei e major i le vaega lea o le engineering. E le o mafai ona ofoina i totonu o Samoa courses ia mo tamaiti faainisia. E le o mafai foi e Ausetalia ona faatino le online courses e tau cover ai le vailiu lea.

Lau Afioga i le Minisita, se i toe silasila ane lava i le vaega lea. O le tatolo mulimuli i lau Afioga i le Minisita, e masani lava ona ou faalogo i aso ia o fesili, o ai na popoto ai fanau? Fai mai o le faiaoga. O oe o le faiaoga o le Matematika, toe fai faalelei au pasene ina ia popoto uma tamaiti Samoa, e calculate ia pasene faatulagaina.

Ona oo mai lea i le totogi o faiaoga pre-school, faafetai ua tafa se finagalo ma se tofa. O lenei itumalo e toeitiiti lava o nuu uma e i ai pre-school. A o le faafitauli, e le totogia. Lau Afioga i le Fofoga Fetalai, ou te fia faamauina, o le tasi lenei o age, o le 1 agai i le 5, e taua i le olaga o le tamaititi. Ae afai e le ave i ai se faatatau, o lona uiga, e faigata le galuega i le tamaititi o le a oo atu i le Primer 1 po o le Year 1. Na pau foi lea o le age o tagata e mafai ona e tago e gagau tulou faasao amioga a le fanau. Ae afai e le totogia faiaoga o pre-schools, o se mala paga. Ae faafetai o le ua taoto le faatofalaiga e totogi faiaoga o pre-school ma aoga a le lotu.

Faamolemole lau Afioga i le Minisita, ua tataua ona toe faasolo le faapipiina o tatou wifii i totonu o aoga. E tasi lenei o poloketi na matuai alalaga ai lenei itumalo o Vaisigano Nu 1 ma fai mai o Niuava, o Niuava. Ae a toe aveese nei, ua le toe lagona se leo o Niuava, o lona uiga, e toe faapipii, e toe sau foi Niuava i le isi Paeaiga.

Ona oo mai lea i lau Afioga i le Minisita o Faatoaga ma Faigafaiva. E toatele si o matou itumalo sa faatumuina a latou pepa i le poloketi foi lea o le SAFPROM ea, pe sao ea au. Ae oo mai lava i le aso e le i tali atu, si nei itumalo i ana manaoga. Se i alofa lau Afioga i le Minisita, ia e tepaaina le siusiu o Salafai e i ai lenei itumalo. Ia silafia foi e lau Afioga, o le itumalo lenei ma lona maa o lo o fausiaina ai po o le geology o le itumalo lenei e fou lona geology. E masalo o lona ua silasila i ai lau Afioga. A na i ai se kamupani latou te avea le maa i fafo, o le tasi lenei itumalo miliona, aua e

maa loaloa. O le ala foi lena o le tele o tamaiti e fefefe i le itumalo lenei. E tele le maa ae le tauaimaa.

Ona oo mai lea i le koko. O le itumalo lenei o le faaautama o le aiga o koko, e iloa uma e Samoa. Lea ua koko uma ai Samoa. O lo o taoto foi i le Maota lenei le saunoaga a le Afioga i le Aloalii, fai mai, o e susue fuefuesaina, o lo o tele ai le mau taavale. O lea ua toe maua le tulaga o le koko i le itumalo, peitai ua leaga le maketi, ua le iloa e tagata po o fea a ave i ai le maketi. Ae matou te talitonu i lou tulai mai, o oe o le agelu na valaau i ai le Atua e te toe afio mai, e te fesoasoani i le atunuu ma le itumalo.

Lau Afioga i le Minisita o Fanua o le Malo. O le tasi lenei o itumalo ua leva lana tautua i le atunuu ma Samoa. O le tele o fanua o lenei itumalo, sa i lalo o le cornwall estate, ona faasolosolo mai lea i lalo o le vaega lea o le esetete se i oo mai i le aso, o lea ou te faalogologo atu o lea ua i lalo o le Malo. Ua tupu aiga, ma ua toatele tagata ae ua le lava eleele o nai ou nuu o Asau ma Auala. Na ona tatalo atu ae faamatu muamua mai le 300 eka muamua pe afai e tau i ai se finagalo. Ia ona faasolosolo mai lava lea o eleele o lenei itumalo seia oo ina toe aumai uma. O le eleele sa i ai le ililaupapa, o le eleele sa i ai le uafu ma tane tetele, a o lenei foi itumalo e alu atu lava i tai le eleele o le Malo e tau i luga i atumauga i le mea o lo o i ai le Masamasa. Talofa e i lenei itumalo.

Ona oo mai lea o se tala i le Minisita o Vaalele. Lau Afioga i le Minisita, tau lava ina faamanatu atu, o lo o i ai le malae vaalele i Asau. Afai ae tatala malaga a tatou Twin Otter ia e lele i Maota ma Asau e tailua i le vaiaso tau ina amata ai, o se fesoasoani tele lea mo lou itumalo. Mo le silafia e Samoa vaeane lau Afioga i le Fofoga Fetalai, o le itumalo lenei na muamua lava tietie i vaalele. Ae ou te matauina lava i le taimi o le faiga palota na mavae atu nei, o lou itumalo sa tele ina faaogaina le vaalele lea sa lele i le taimi lea, e \$120 i le one way.

Ae lau Afioga i le Minisita afai ae \$120 return, talitonu mai oe, e sili atu le polofiti e maua mai le agai i Asau ma Maota nai lo lou taumafai e te lele i Aukilani ma Ausetalia. Ae talitonu foi, e i ai le tagata o le itumalo o Vaisigano Nu.1 e usu mai Savaii e faigaluega ma toe foi pe a faapea e faatino le faamoemoe lenei. Ae o se fesoasoani malosi lea i le tourism sector ma le aufaipisinisi i Savaii, lele mai i le vaalele pe a tatala Fagalii, fai le faatau toe lele i Savaii ese le faigofie. E tele foi au tupe o le a maua ai, ae o se fesoasoani taua foi mo le falemai i Sataua. A kili mai le mai i Sataua e agai mai Tuasivi, e oo mai Tuasivi ua 4 mai faaopoopo. Aisea? E le gata i le patupatu o le auala, a o le umi toe mamao i tua o lea itumalo. Na ona tuu atu i ou autafa. Ma le tatalo mulimuli lau Afioga, toe tatala Fagalii lau Afioga i le Minisita.

Ia ona oo mai lea o se talanoa po o se manatu i le Minisita o Punaoa Faalenatura ma le Siosiomaga. Lau Afioga, faafetai. E manatu o lo o faatau pea faafitauli o lo o feagai pea ma Samoa i le tulaga o le lolovaia o le atunuu.

E i ai lou talitonuga ua mautu le tele o Tulafono, policy framework for conservation ae manaomia lava le faamalosiā o nei Tulafono. Ua na ona fai ma tuu i luga o fata ae leai ni tupe e faatino ai ma faamalosiā ai. E leai lava se tali o lo tatou tali atu i suiga o le tau, o lo tatou toe tepa i atumauga e afua mai ai manuia. O lona uiga, e tatou te foi i luga o mauga e fofo ai le faafitauli lenei o le lolovaia o le atunuu. Fai mai le upu a le atunuu e masani ai, e afua mai mauga manuia o nuu, e le afua atu i lalo nei. O lona uiga, a le faasaoina punavai ma vaomatua i atumauga, e tatou te fesagai pea ma nei faafitauli ma le lolovaia o le atunuu. Faafetai mo le faatauaina pea o le vaomatua ma laufanua apovai o Samoa. E i ai lava i latou e matou te talatalanoa ma pei e fai ma o latou ulaga le o atu i le itumalo lenei o Vaisigano Nu.1, lea ua soo uma i moli e alu i le uila, e alu i le la, renewable energy malosiaga faafouina. A o lea foi ou te tilotilo atu i le anava o lo oi ai, o le 2025 na tataua ona selau pasene le renewable energy o Samoa. O lona uiga ua tataua ona tatou toe vaavaai i nisi auāa e faatosina mai ai, renewable energy project e tatou te tuli ai le tatou maa lea e tuli. Ae ou te vaavaai atu foi i le tulaga lea, e pei lava o lea e fragmented solo le vaega ia o le energy ma le renewable energy. Na o se faatupu manatu, silasila i ai lau Afioga i le Tamaitai Minisita ma lau Pulega, pe le manaia ae tuufaatasi le energy sector i se Ministry se tasi latou te faatino uma ai galuega nei.

Faafetai mo le \$4 miliona o lea ou te matau atu mo le vaega lea o le waste management. O le tasi lenei o faafitauli e aafia uma ai...

FOFOGA FETALAI: Ua ou vaelupeina le saunoaga a le sui usufono mamalu mai Vaisigano Nu.1, ia ou te talitonu foi o lea ua faafofoga lava ma le totoa le paia o le Maota aemaise foi o le itumalo ma le atunuu i le saunoaga. Talu ai ona o lo o i ai le faamoemoe e fia tuuina atu se lafo i luma o le Palemene, ae talitonu o le a faaauau taeao le saunoaga a le sui usufono mamalu.

Ua faamalo saunoa i le paia o sui usufono sa sausaunoa i lenei aso. Ua faafofoga foi itumalo ma le atunuu, faamalo tapena, faafetai saunoa faatamalii.

Ae ou te tapa lau Afioga i le Tamaitai Palemia mo se lafo. Ma le agaga faaaloalo.

LAFO A LE PALEMIA

Afioga Hon FIAME NAOMI MATAAFA (Palemia): Faafetai i lau Afioga i le Fofoga Fetalai. Ia o lau Afioga i le Fofoga Fetalai, talu ai o le faalavelaveina o Taulumaga a le Palemene o Samoa i ala le aloaia e le Vaega Faaupufai a le HRPP. Ua maea ona fofoga Samoa i lau faasilasilaga i se auāa talafeagai mo le saogalemu e puipui mai ai i ni vevesi e tulai mai.

Peitai, ua tausolomua le HRPP le le amanaia o lau Afioga i le Nofoa, o le Palemene lava lea.

O lea ou te faatuina ai le lafo, *Ina ia tolopoina nei le Taulumaga a le Palemene seia aulia le aso a taeao i le itula e 9:30.*

Ia o le lafo lea ma le faaaloalo i lau Afioga.

Faaluaina e le Sui Palemia, Minisita mo Galuega, Felauaiga ma Atinae Eseese, Minisita o Pisinisi, Alamanuia ma Leipa.

Na faamaonia le lafo.

FOFOGA FETALAI: O lea ua faatu le lafo ma ua faaluaina ma faamaonia e le Palemene. Ia ae na ona toe momoli atu o le faafetai a le Nofoa i le paia o le Palemene i lo outou onosai ma le lavapapale. Le tapuaiga a Samoa, faamalo le tapuai faamalo tatalo ua faaiu galuega a le Palemene i lenei aso, a o lo o e tapuaia pea lona alofaiva. Le loaloa o Samoa i ona tulaga faalupeina, faamalo faafetai. Ia i ai pea le agalelei o le Atua i lenei Palemene ma le tapuaiga a Samoa.

A o le i tolopoina le tatou Fonotaga ou te tapa le sui usufono mo Lefaga ma Faleaseela mo le tatou tatalo faaiu.

Na tolopo Taulumaga a le Fono Aoao Faitulafono i le itula e 12:03 i le aoauli seia aulia le itula e 9:30 i le taeao o le Aso Tofi, 16 Setema 2021.